

# Liber Maiolichinus

## Liber Maiolichinus

# INCIPIT LIBER MAIOLICHINUS DE GESTIS PISANORUM ILLUSTRIBUS

## Incipit liber maiolichinus de gestis pisanorum illustribus

*El "Liber Maiolichinus" es el documento histórico más antiguo, en el que se ha hallado el étnico "catalán" y "Catalania".*

*El "Liber Maiolichinus" es una crónica Pisana, escrita en latín medieval, y escrito hacia 1117. Relata la expedición que pisanos y catalanes realizaron contra la Ibiza y Mallorca musulmanas.*

*Con este documento se constata que pasados tres siglos desde la conquista Franca de Barcelona, y la estructuración de la Marca Hispánica, ha nacido ya un sentimiento colectivo diferenciado en torno al Condado de Barcelona.*

*Se desconoce el origen del étnico, pues nunca antes había sido usado y no existen registros de el.*

*Los árabes llamaban a los habitantes de la Marca Hispánica, Francos, sin hacer distinción alguna respecto a los vecinos del norte. Y al territorio de la Marca Hispanica, al-firanja, como al resto de Francia, y por extensión, de toda la Europea occidental.*

*Por el contrario, los Francos les llamaron Godos y al territorio, Marca Gótica. Posteriormente se designó a la franja sur de la Marca Gótica,, Limes Hispanicus y Marca Hispanica.*

*Había transcurrido más de un siglo desde que el Conde Borrell de Barcelona rompió el pacto de vasallaje que unía a los condes de Barcelona con los reyes Francos, y la política autónoma de estos se traducirá en el inicio de la expansión de los condados catalanes hacia el sur.*

*La constatación de ése sentimiento col.lectivo lo hallamos en los apelativos que los Pisanos dan al conde de Barcelona, Ramón Berenguer III:*

|                                     |                                  |
|-------------------------------------|----------------------------------|
| <b>Dux Catalanensis</b>             | (Duque Catalán)                  |
| <b>Rector Catalanicus hostes</b>    | (Rector de las Hustes Catalanas) |
| <b>Catalanicus heros</b>            | (Héroe Catalán)                  |
| <b>Christicolas Catalanensesque</b> | (Cristiano Catalán)              |

*El étnico presenta los siguientes usos:*

**Catalanenses**  
**Catalanensis**

*Y el referido al territorio de los catalanes, Cataluña, es:*

**Catalania**

**Cum Catalanensi de litore classis abiba**  
**In Catalanensi consistunt litore puppes.**

*A medida que los diferentes condados se van reagrupando en torno al de Barcelona, se irá extendiendo el étnico "catalán" y el territorial de "Cataluña", mas allá de los dominios del Condado de Barcelona, siendo equiparable al territorio de la actual Cataluña, en la manera en que lo usa Jaime I el Conquistador hacia 1230.*

*Nótese finalmente, que el "étnico" es puro en su sentido. Esto es, Cataluña (Catalan-ia) no era ningún tipo de estado, ni reino, ni marquesado, ni ducado, ni condado, y por tanto, no se puede derivar de ella una ciudadanía. Es en todo caso, al revés; dado el "étnico" catalán, sus territorios reciben el nombre de "Catalan-ia".*

*El documento íntegro se puede consultar online en:*

<http://icon.di.unipi.it/ricerca/html/lbm.html>

*El documento íntegro se puede consultar online en:*

[http://www.bibliotecaitaliana.it/dynaweb/bibit/autori/sa/anonimo/liber\\_maiolichinus/@Generic\\_BookTextView/104;pt=6333#X](http://www.bibliotecaitaliana.it/dynaweb/bibit/autori/sa/anonimo/liber_maiolichinus/@Generic_BookTextView/104;pt=6333#X)

*Un extracto se puede consultar online en:*

[http://www.stilepisano.it/antichidocumenti/antichi\\_documenti5.htm](http://www.stilepisano.it/antichidocumenti/antichi_documenti5.htm)

## Indice

- [1. Libro I](#)
- [2. Libro II](#)
- [3. Libro III](#)
- [4. Libro IV](#)
- [5. Libro V](#)
- [6. Libro VI](#)
- [7. Libro VII](#)
- [8. Libro VIII](#)

[p. 4]

---

*Incipit liber maiolichinus de gestis pisanorum illustribus.*

---

### 1. Libro I

Pisani populi vires et bellica facta  
Scripsimus ac duros terre pelagique labores,  
Maurorum stragem, spoliata subactaque regna.  
Ceptis ergo meis digneris, Christe, favere.  
5Rumor ab Hesperia Latias delatus in urbes  
Romanos Siculosque tenet, gentisque Latine  
Litora nulla vacant fremitu: terroribus huius  
Grecorum populi quatiuntur ab usque Chorintho,  
Et timor illatus, quos late corripit omnes,  
10A pelagi studio longe facit esse remotos.  
Namque dum contra proprias Maiorica vires  
Exerit Italiam, navali fisa paratu,  
Sicaniamque petit et Achaica litora circum  
Navigat, inque Dei servos vesana potenter  
15Sevit, cum templis divinas polluit aras,  
Diripit, incendit villas castellaque multa,  
Captivosque trahit, quos non interficit, omnes,  
Et monet, ut nichilum, Christum legemque negare,

[p. 5]

Et precepta sui complecti vana Rasulle.  
20Hinc sibi credentes amat, amplexatur, honorat,  
Contra dicentes tormentis applicat atris.  
Venduntur quidam sub conditione nefanda,  
Hos ferrum maniceque domant sub carcere tetro,  
Hos cruciant inamata fames nimique labores.  
25Et, ceu testantur qui vera referre putantur,  
Milia captorum plus quam ter dena fuerunt,

Quos pariter Baleri vinxit tenuitque tirampnus,  
Preter ad ignotas quos per comercia gentes  
Transtulit, aut atrox obitus de carne resolvit.  
30Fama mali tanti per plures cognita terras  
Commovet extimplo sitientes prelia Pisas.  
Concitat ira senes, qui Punica vincere regna,  
Subdere quique suo gentes potuere tributo.

[p. 6]

Hi, memorant dum facta Bone, dum bella Panormi  
35Victaque per varios quam plurima prelia casus,  
Accendunt animos iuvenum, quibus orrida facta  
Et labor et sudor et duri gloria Martis  
Divitiis et delitiis potiora fuerunt.  
Petre Dei presul, meritis venerande beatis,  
40Iam populis memor esto tuis celestia signa  
Tradere, que valeant gentilia monstra timere.  
Namque die Domini, quo Christus Tartara cuncta  
Vicit, et humanas animas de morte resurgens  
Tartarei dominus traxit de fauce profundi,  
45Hortaris populos celestis signa salutis  
Sumere; quique daret, qui sumeret ipse fuisti  
Primus; te reliqui voto fervente sequuntur,  
Suscipiuntque Dei multorum milia signum.  
Inde duodenos de culmine nobilitatis  
50Constituere viros, quibus est permissa potestas  
Consulis atque ducis, regerent ut gnaviter omnes,  
Purus et istorum disponens singula sensus  
Congrua militie, ratibus quoque conficiendis  
Queque iuvare queant homines classemque pararent.

[p. 7]

55Et ne pretereant horum te nomina, lector,  
Que dictando canam, lineas scrutare sequentes.  
Ex his Gerardus Gerardi filius, auctus  
Sensibus, orator laudabilis atque facetus;  
Natus et Ugonis, patrum de nomine dictus  
60Gerardus, patrum claro iam dignus honore;  
Sicherioque satus, titulis decoratus eisdem,  
Petrus et Atho simul numero dictantur in isto.  
His Ildebrandum Rolando iunge creatum,  
Viribus et factis et nobilitate micantem,  
65Hinc Erithone satum, genitoris nomen habentem,  
Nec non Henricum, genus a Vinitihone trahentem,  
Lotarumque simul iuvenemque sciumque Dodonem.  
Hos decorant Stephano genitus Rodulfus et una  
Filius Uberti Lambertus clarus in urbe,  
70Atque Robertinus Francardi splendida proles.  
Horum consilio clari cum presule digno  
Legati Romam vadunt, quos papa colendus  
Nomine Paschalis multo suscepit honore,  
Pontifici tribuendo crucem, romanaque signa  
75Militie ducibus, que presens Atho recepit.

[p. 8]

Qui, postquam monuit pietatis dogma catervam  
Et quantum Scriptura pati pro fratribus optet,  
Hortatus cunctos sanctis insistere ceptis,  
Pro tanto facto peccamina cuncta relaxat,  
80Hancque potestatem Pisano tribuit altam  
Pontifici. Redit hic propriam properanter ad urbem.  
Protinus a populo digna statione receptus  
Astantes turbas monitis papalibus implet.  
Et ceu durescit calido moderamine ferrum  
85Mulciberis coctam dum temperat unda bipennem,  
Pontificis pariter Pisani voce sacrata  
Fervent Alphee fortes ad bella phalanges.  
Inde brevi valde numero labente dierum  
Tertia vox Ianuam, placidos moderata rogatus,  
90Presulis invitat. Spondet solatia pugne;  
Sed longas nimiasque moras, annalia donec  
Tempora pretereant, fraudis sub tegmine poscit.  
Pisani didicere patres fraudemque dolumque.  
Ut tandem patuere doli, retinacula solvens  
95Navita Pisanam sua vela retorxit ad urbem.

[p. 9]

Tunc demum Pise tanto sonuere dolatu,  
Ut nec magna quidem sentire tonitrua posses.  
Quicquid tunc habuit nemorosi Corsica ligni  
Aut picis innumeros rarium defertur ad usus,  
100Lunensesque suo privantur robore silve.  
Arboribus cesis remanet Curvaria rara;  
Antennas que vela ferant, quod gestet easdem  
Arboreum robur, celse tribuere Mucelle.  
Ceditur omne nemus, cesum descendit ad undas.  
105Hoc varie fiunt diviso robore naves:  
Gatti, drumones, garabi, celeresque galee,  
Barce, currabii, lintres, grandesque sagene  
Et plures alie variantes nomina naves.  
His ponuntur equi, sunt quedam victibus apte,  
110Ingentes alie possunt portare catervas,  
Servitiis norunt possuntque subesse minores.

[p. 10]

He numquam metuunt vicinas tangere terras,  
Adducunt latices, homines ad litora vectant;  
Lura galearum iuvenum sunt apta lacertis.  
115Harum quamque solent centum propellere remi,  
Ordine que bino plana nituntur in unda,  
Et freta scindentes fugiunt sic atque sequuntur  
Ut celeres capreas et aves superare volantes  
Veloci valeant undosa per equora cursu.  
120Ligni materies non solum congrua classi;  
Hinc etenim turre, pontes scaleque geruntur,  
Cum quibus excelsos invadant agmina muros;  
Hinc quoque que magnas mittant in menia moles,

Exagitent rumpantque domos, tormenta parantur;  
125Hinc balista minax, aries, testudo petuntur,  
Sicque per innumeros lignum distenditur usus.  
Nec cessant fabri; ferrum consumitur omne;  
Quod, quia diversis rebus facit officiisque,  
Mille per artifices vario distinguitur actu.  
130Nec vacat officium; depingunt arma colores,  
Resplendent galee, clipei selleque micantes,  
Impositumque super cum gemmis prenitet aurum.  
Interea veniunt quidam de gente remota,  
Romaque cum Luca mittunt solatia pugne.

[p. 11]

135Auxilium bello Ianuensis sola negavit  
Patria, quamque potest Pisanos impedit actus.  
Denique perfecte naves mittuntur in undas:  
Accepit has Sarnus, greco vocitatus ab amne  
Alpheus, cui Pisa vetus, nunc lapsa, cohesit,  
140Ex qua Pisanus, qui Pisas condidit istas,  
Italiae fluvio nomen donavit et urbi.  
Hinc propria puppes queque statione ligantur,  
Implenturque cibus, equis armisque virisque,  
Et dantur ratibus certissima signa quibusque,  
145At vexiliferi per turmas atque cohortes.  
Istorum virtus, populis bene nota Latinis,  
Credidit ad bellum facili conducere cursu  
Agmina. Decipiunt mortalia pectora cure;  
Consiliis hominum quoniam fortuna repugnat,  
150Atque malis factis alicuius ponere finem  
Ante suum tempus non vult divina voluntas.  
Temporibus sata queque virent et temporis albent  
Articulo, cunctis data sunt sua tempora rebus.  
Temporis ordo monet, nature postulat usus,  
155Ne, nisi maturi, rapiantur ab arbore fructus.

[p. 12]

Sed Domino, qui cuncta potest, sunt subdita queque,  
Et quodcumque bonum nutu distinguitur eius,  
Cuius amore suos cognatos atque parentes,  
Divitias, patriam Pisani deseruere.  
160Iamque dies aderat sancti celeberrima Sixti,  
In qua Pisani de Penis marte subactis  
Annales recolunt votiva laude triumphos,  
Quando per Alpei fluctus populosa natabat  
Classis, et ad fauces limosi fluminis artas  
165Convenere rates. Sed cum transire nequirent  
Temptantes aditus albentis more fluenti,  
Exonerare suas escis armisque carinas  
Ceperunt. Post hec spatiosa per equora naute  
Direxere viam, terris post terga relictis.  
170Cernentes placidam fixis obtutibus urbem  
Divine cure sua menia, rura, penates,  
Uxores, patriam, natorum pignora mandant.  
Dumque rates abeunt, plorant in litore matres,

Plorantum lacrimis bibule satiantur arene,  
175Pectus ad usque parens vitreas descendit in undas,  
Et verbis placidis benedicit in equore natum.  
Hec pro patre rogat, pro fratribus atque maritis

[p. 13]

Inmensos alie fundunt in litore questus.  
Non aliter Graios flevisse feruntur Achive,  
180Pergama quando rates Danae violente petebant.  
Et non desistunt precibus miscere querelas,  
Eolia ventus donec progressus ab aula  
Visibus arreptos spatiosa per equora vexit.  
Stagnea planities a leva parte relictas  
185Atque Liburnus erant, dextra Gorgona remansit.  
Monteque cum Nigro Vada seu Populonica tellus  
Effugiunt visus, dum ventus in equore perflat.  
Corsica sub velis fuerat, Capraria tergo.  
Fertilis Ilba iacent Planosaque parte sinistra;  
190Dumque favent venti, Tauro post terga relictas,  
Adveniunt Longona rates, linquuntque lebetes,  
Et retinent portum dictum de nomine sancte  
Quam Reparata vocant. Muros templumque vetustum  
Erecti lapides scopulosaque litora monstrant.  
195Hosque sinus exire parant, pariterque resumunt  
Turrenses aditus, ubi Constantinus habebat  
Sedes, rex clarus, multum celebratus ab omni  
Sardorum populo. Bis sex geminisque diebus,  
Operiendo suos, ibi gens Pisana moratur,  
200Inde sinum repetunt, quem vulgo ferunt Caput Album  
Scilicet ob nullum trepidantia litora ventum.  
Istic Durbinus Pisanis associatur,

[p. 14]

Qui quondam regnum censebat Calaritanum,  
Et Constantino Saltarus iudice natus;  
205Prevalet hic iaculo, preclaris sensibus ille.  
More pari Danaos Ecateia suscipit Aulis  
Cum fuerat Frigios Menelaus iturus in hostes.  
Civibus hic presul multum de pace locutus,  
Plurima per paucos incassum semina fudit;  
210Sed tamen e multis fructum percepit eorum.  
Tunc Passarino committunt Alpherioque  
Ducatum pelagi patres communiter omnes,  
Hosque sequi naute sed et observare iubentur.  
Iussa patrum contempta iacent, convertitur ordo;  
215Quisquis enim potuit celeri transcurrere ligno  
Ostendit sociis velis et remige puppes.  
Iam, geminis lapsis gemina cum nocte diebus,

[p. 15]

Tertia lux ierat, nox et iam ceperat esse,  
Tertia septembris vicinior ulla kalendis  
220Non fuerat, nisi postera que sibi forte secunda  
Expectabatur, nec ea tenebrosior ulla.

Circumquaque tonat, sed undique crebra coruscant  
Fulgora. Turbari nautas reliquosque videres,  
Qui nondum rabidi bene norant equoris usum.  
225Sidera nulla patent oculis, solosque micantes  
Naute cernebant accensos puppibus ignes.  
Non Laerte satus foret in terroribus istis  
Intrepidus, Circes quamvis superaverit artes,  
Si fortuna ducem fluctus duxisset in istos.  
230Arbitrium cuiusque fuit mirabile tempus  
In tempestatis transcurrere seva pericla.  
Sed Dominus, solitus propriis succurrere servis,  
Iustitiae semper qui salvat et auget amantes,  
Firmavit Boreae placidos super equora flatus,  
235Qui tota leni portarunt equore nocte  
Naves. Mox, pulsus tenebris, subiere micantes  
Stelle; nox abiit; preclari forma diei  
Subsequitur; celeris classis levitate cucurrit.  
Hac crescente die ceperunt cernere terras  
240Hispanas, sed eas Baleares esse putabant,  
Blandensi donec comittitur anchora ripe.  
Has postquam retinent Latio de litore vecti,  
Astis suspendunt pugnam minitancia signa,  
Atque tegunt fortes clipeis radiantibus artus,  
245Et stringunt rigidos totis conatibus enses.  
Litora tota sonant ex rauca voce tubarum.  
Indigenas, quoscumque vident, capiuntque fugantque,

[p. 16]

Atque sequuntur, eos Baleares esse putantes.

**Hii se Christicolae Catalanensesque fatentur.**

250Turbatos volvunt Pisani pectore sensus,  
Et, positis armis, resident in litore tristes.  
Barchinonensis postquam cognoscitur ora,  
Mutant consilium, diversa pericla timentes,  
Quod nec habetur ibi vento tutamen ab omni,  
255Transieratque simul vallata caloribus estas.  
Tunc ex consulibus Rolandi filius unus,  
Cui genus et sensus clarum quoque curia nomen  
Et civilis amor cum divitiis tribuerunt,  
Mittitur ad comitem cui Barchinon atque Girunda  
260Subduntur, multasque regit pro viribus urbes,  
Cui nomen Raimundus erat, qui laudis equestris  
Fructus innumeros clarosque paraverat actus,  
Hispanos cuius terror commoverat hostes.  
Rolando genitus, postquam pervenit ad ipsum  
265Atque salutavit: " Comitum clarissime ", dixit,  
" Pisanus populus Christi virtutibus auctus  
" Ecce, favente Deo, partes devenit in istas,  
" Alterius verbis quod iam tibi forte relatam est.  
" Quod si causa monet, scu ditia castra videre  
270" Te iuvat, acceleres Pisanam visere classem.  
" Te sociare sibi belli sociumque ducemque

[p. 17]



" Agmina nostra volunt; ferus et te provocat hostis;  
" Nam quem non moveat Balearis seva tirampni  
" Fama, repercussi que fines concutit orbis,  
275" Et Latii populos cunctosque perurguet Achivos? "  
Necdum finierat consul, cum plura paranti  
Ille refert grates: " Faciat quoque prospera ", dixit,  
" Omnia vestra Deus, vobis et in omnibus adsit,  
" Inque manus vestras communes prebeat hostes  
280" Orbis, et in sancte sortis nos congreget usus,  
" Ut faciamus ei que sunt gratissima semper;  
" Nam contra nullos ego iustius arma movebo.  
" Hii Christi servos multis cruciatibus arcent,  
" Atque meum litus faciunt cultore vacare;  
285" Nam quos Blandensi positos in litore muros  
" Templata videtis erant miris radiantia signis,  
" Quorum summa tegunt edere, vel frondea vitis  
" Occulit aut ficus, seu quelibet occupat arbor.  
" Pluribus in templis monachi cecidere per ipsos  
290" Atque sacerdotes, iugulis maculantibus aras;  
" At reliquos etate viros aut arte micantes  
" Constituere suis duris servire catenis.  
" Vincla, labor, dolor atque fames hos sepe necarunt,  
" Aut ius Machamatis quos ponere triste coegit  
295" In cervice iugum. QQQQOouem non dolor excitat iste?  
" Quod si forte Deus vobis concesserit ut vos  
" Tanto possitis finem prebere labori,  
" Pisanis dominis solatia queque paramus,  
" Viribus et nostris sequemur comitantibus illos ".  
300

[p. 18]

Nuntia dictorum mox carta futura notatur,  
Qua se Pisanis verum promittit amicum,  
Atque Pirenee concedit singula terre.  
Tunc Ildibrandum donat multumque precatur  
Ut se Pisanis socio coniungat amore.  
305Altera lux postquam cives conduxit in unum,  
Talibus alloquitur Pisanos vocibus Atho,  
Quem grate populus celebrabat munere lingue:  
" Quod Domini nutu disponitur, a ratione  
" Funditus humana cognoscitur esse remotum.  
310" Vidimus ingentes fluctus tonitrusque coruscus;  
" Credidimus subitos minitari fulgora ventos.  
" Mox Domini pietas pacatas reddidit undas  
" Equoreas nobis; vis est ea nempe Tonantis,  
" Nam pro velle suo mundanos destinat actus,  
315" Arbitrioque pio causa dominatur in omni.  
" Hanc pedibus nostris tribuit contingere ripam,  
" Ut socias relevet divina remissio turbas.  
" Ergo, viri docti, dum litore stamus in isto,  
" Divinos augere decet cuneos, felicia dici  
320" Ut vero valeant, non casso nomine, castra.  
" Barchinonensis comitis solatia vobis,  
" Auxiliante Deo, possunt non parva parari.  
" Vos portare suos equites rogat ille ducentos,  
" Centum se propriis spondet gestare carinis;

325" Misit et hanc cartam ". Cartam porrexit et addit:  
" Istuc nos Dominus duxit, non nostra voluntas;  
" Qui famulatur ei bene speret et indubitate,  
" Quod vera numquam fraudabitur utilitate.  
" Presul abest, portumque tenet qui distat ab isto  
330" Per passus sex mille, reor; mittamus ad ipsum,

[p. 19]

" Et si dicta placent, tunc perveniamus ad actus ".  
Hisque peroratis, placuerunt dicta quibusque.  
Carta legi comitis petitur, fractoque sigillo  
Inspexit Lodoicus eam legitque decenter.  
335Lecta placet cunctis, comiti dant agmina laudes.  
Sancti Felicis portum gens illa vocabat,  
In quo presul erat. Properans legatus ad ipsum  
Vadit; sed presul recipit firmatque loquelas.  
Dimittunt blandas post hec cum turbine naves,  
340Atque petunt portum sanctus quem presul habebat,  
Cuius ad ingressum ventus pugnabat iniquus.  
Ut portum tenuere rates, et cetus haberi  
Cepit, et erboso steterat iam contio prato,  
Optimus antistes, sancte pietatis amator,  
345Talibus Alpheos monuit orando loquelis:  
" Sanguine vos proprio quos Christus ab hoste redemit,  
" Ut veras spinas veteres fugitote ruinas.  
" En sunt tres lapsus, quibus estat Adam superatus;  
" Namque Deum perdit male qui cupit atque superbit,  
350" Et male letatur cui gloria vana paratur.  
" Nascitur hinc odium, discordia, livor et ira.  
" Ista movere queunt hominum precordia dira.  
" Non valet esse bonus viciis qui subiacet istis.  
" Vincere nemo potest, quisquis superatur ab ipsis;  
355" Pectora nam lacerant, sensusque trahunt velut hostes,  
" Dirripiunt, capiunt; ipsis vos claudite postes.  
" Non Domini genitum pro se tormenta tulisse,  
" Ast homines propter, debent homines meminisse.  
" Hic minuit nostros languores, atque reatus  
360" Tollit, et hic penas cunctosque fugat cruciatus.  
" Pace Deum debent et mentis simplicitate

[p. 20]

" Querere, non odiis, homines, aut asperitate.  
" Qui pacem portant celo possunt habitare.  
" Debetis fratres cum voto cordis amare.  
365" Si nec amatis eos, quos vos modo forte videtis,  
" De nondum visis michi numquam spem facietis.  
" Horum quisquis enim presentes tempnit amores  
" Qualiter illorum poterit relevare dolores?  
" Pacis amatoris non est possessio parva,  
370" Sidera namque tenet pontumque beatus et arva.  
" Postquam de Saulo Dominus sibi fecit amicum,  
" Sit nemo nostrum fratrem ducens inimicum.  
" Vera sit in nobis et non concordia falsa,  
" Si tuti vultis transire per equora salsa.

375" Trina Dei virtus nostros ut terreat hostes  
" Pax sua possideat nostros cum limite postes ".  
Interea vulgus pelagi terrore solutum  
Murmurat, et patrias exoptat turpiter horas,  
Inque duces stultas temptans agitare querelas,  
380Hostibus ommissis, pariter remeare minatur.  
His permotus ait Lucensis talia Fralmus:  
" Laudet quisque Deum cui sunt cum prosperitate  
" Omnia, letetur cui congrua queque parantur.  
" Congrua namque reor socios et multiplicare  
385" Subsidioque viros proprii reperire laboris.  
" Qui socios augere potest bene percutit hostes,  
" Quos satis egregios nobis divina paravit  
" Gratia, nec nostrum teneat turbatio quemquam,  
" Cum bello quisquam nec adhuc superaverit hostem,  
390" Ex quo cepimus hoc, neque sit superatus ab hoste.  
" Ut quid tanta tenet vestras turbatio mentes?  
" Penitet ignavos cepti fortassis honoris?  
" Cur vox istorum preclaras polluit auras?  
" Hosque piget venisse quidem, qui rura solebant  
395" Vertere, qui curvis incumbere semper aratris,

[p. 21]

" Cunctaque consumunt vertendo tempora glebas.  
" Et modo, cum nequeant sua semina tradere sulcis  
" Aut conculcato pedibus procumbere musto,  
" Nocte dieque moras istas casusque queruntur,  
400" Inque domos migrare suas fortasse minantur.  
" Vile genus hominum, quorum miserabilis etas  
" Presenti populo nullam gerit utilitatem.  
" Semper agant semperque gemant, semperque susurrent,  
" Quos mores retinere suos infamia non est.  
405" Nos bonitas clarumque decus seiungat ab illis  
" Et maneat nostro concordia semper in actu,  
" Sitque carens odio qui vult servire Tonanti.  
" Si decies prohibetur iter, decies repetatur,  
" Et via temptetur crebro dum perficiatur.  
410" Ut tenuit semper, teneat reverentia nostras  
" Curas, quod gerimus quia totus conspicit orbis.  
" Si cito non aderit quod gestit nostra voluntas,  
" Tactus ob hanc causam maneat formidine nemo.  
" Quod prohibet mensis, reddunt tibi namque kalende,  
415" Cum Deus oratur, quod ab ipso forte vetatur  
" Tempore non modico, cito prestat luce sub una ".  
His populus dictis avidas ut prebuit aures,  
Gaudia succedunt; turbatio, cura recedunt.  
Moxque, sequente die Domini, Raimundus ibidem  
420Berengarius adveniens paucique suorum  
Iungit amicitiam. Pisani federe gaudent,  
Et socium factum prestanti munere donant.  
Dumque moras faciunt, morbosa peste fluente,  
Multi de populo fati superantur iniquis.  
425Hicque Caim moriens mestos cum presule cives

[p. 22]

Dimisit, patrias non totus iturus ad oras.  
Dumque premunt lacrimas, Pesulani montis alumpnus  
Cum sociis centum Vilielmus castra subintrat,  
Armigeris ratibus vectis turbaque pedestri,  
430 Quos quasi viginti duxere per equora naves.  
Ast Aimelricus generosa stirpe creatus,  
Quem Nerbona colit dominum patremque ducemque,  
Viginti vitreas fertur duxisse per undas  
Naves, et celeri venisse per equora cursu.  
435 Hos quoque Raimundus, cui Balcius extat origo,  
Cui solitos Arelas impendere certat honores,  
Atque secus Rhodanum castris reperitur et arvis  
Dives, consequitur, laudato milite plenas  
Ducens septenas undosa per equora puppes;  
440 Raimundus sacrista potens, et strenuus actu,  
Militie titulis et qui fulgent Arelate  
Cum propriis totidem vitreas venere per undas.  
Tales Rusilium proceres lateque Biterre  
Et cum Nemausis Provincia tota sequuntur.  
445 Quanta per Ausonias transibant agmina terras  
Cum Romam venturus erat terrendo senatum  
Cesar, cum domitos Gallos iura ferre coegit,  
Tanta Girundenses venisse feruntur in agros.

## 2. 2Libro II

[p. 23]

Postquam Lambertus, consul, de consule factus  
Dux equitum fuerat, multos et classe locarat  
Gallorum, venisse virum de nave ferebant,  
Qua fuit Albertus prudens Ugone creatus,  
5 Alberius cui rector erat: mulam venientis  
Non modicus sudor faciem quoque texerat eius.  
Progenere virum sed que loca, quive parentes,  
Vel quod nomen habet, lector, vitabo referre.  
Ipse tuos narrat subisse, Minorica, portus  
10 Navem predictam, ventorum flamine pulsam,  
Quam rectam tenuisse viam referebat, equosque  
Vi sitis oppressos vini potasse liquorem;  
Defecisse tamen quosdam, pontoque relictos  
Ad loca dicta priusquam posset prora venire;  
15 Retulit et Mauros ad se venisse rogantes  
Et qua sint patria, quas et gradientur ad horas.  
" Bozeam petimus, Ianuenses ", navita dixit.  
" Sed quoniam Pisana manus nos acriter odit,  
" Precipue vestrum quoniam retinemus amorem,  
20 " Hanc formidantes, vestrum contingere litus  
" Cura fuit; factos pro vobis fugimus hostes,  
" Nam nec habere valent nostras in prelia vires.  
" Offendunt quoscumque queunt sine crimine nostro,

" Pervia Sarnigenis sunt equora cuncta, novosque  
25" Gentibus incipiunt tumidi monstrare furores.

[p. 24]

" Vidimus hos sulcare fretum, nos utque putamus  
" Qualibet in vestra figunt tentoria ripa.  
" Ledere sive volunt nos, aut bona tollere nostra,  
" Auxilium nobis celeres prebere rogamus.  
30" Scimus eos venisse quidem, multumque timemus.  
" Mox aiunt: "vos fertis equos" qui forte fremebant.  
" Rustica turba refert, facit hoc irata frequenter,  
" More suo fremitus agitans faciensque tumultus.  
" Hostis quas habuit properanter protinus alnos  
35" Intrat, et intentis nos perturbare sagittis  
" Cogitat, et toto mentitos increpat ore.  
" Nostra manus confisa satis non segnius arma  
" Sumpsit, et in steriles accenditur ira furores.  
" Namque citus veniens ventus, dum vela tetendit,  
40" Mox Baleare dedit nobis contingere litus,  
" Egressisque virum quendam per rura vagantem  
" Vidimus, et quantum locus ille remotus ab urbe  
" Sit percunctamur: "viginti milia" dixit.  
" Hausimus et laticem. Laticis data copia nobis  
45" Ut fuit, inque ratem vasisque virisque receptis,  
" Equora crispavit zephirus, zephiroque favente  
" Fleximus adversum Sardoas carbasa ripas.  
" Sulcantes igitur pelagus venientia vela  
" Aspicimus. Dubitare prius, sed ad arma videres  
50" Veloci cursu iuvenum properare catervam.  
" Quoque modo properant, quos terret aquaticus auster,  
" Ob pluvias operire domos, male tecta supellex  
" Imbris ne pereat pro mole cadentis in edes,  
" Sic gladios clipeosque suos sibi tollere quisque  
55" Certat et intente sinuatos preparat arcus.  
" Accedunt gemine tanta cum pace carine,

[p. 25]

" Quanta, cum repetunt bene cognita pascua, tauri  
" Ire solent quando nullas agitantur in aras,  
" Et velut incedunt iuncti delphines in undis  
60" Quando natant aliquos non dando per equora saltus.  
" Noscimus; accipiunt nostras referuntque salutes;  
" Gaudia precipiti posita suscepimus ira.  
" Qui postquam didicere viam quam fecimus ipsi,  
" Quidve laboris honus passi fueramus ubique,  
65" Sardinie demum sese docuere relictos.  
" Prevaluit boreas zephiro, bis quinque diebus  
" Per mare nos vexit, ventoque cucurrimus illo.  
" Nemo tamen didicit qua tunc foret insula parte,  
" Quove loco pelagi steterit Maiorica post nos.  
70" Interea ventus Libicis progressus ab horis  
" Vela tenens, possedit aquas, salientibus undis,  
" Qui Barchinone nos usque reduxit ad amnem ".  
Talia dicentem populus circumstat, et omnes

Si valeant, querunt, vel si paciantur amici.  
75Incolumes postquam vir dictus retulit omnes,  
Murmure cum leto redeunt in castra caterve.  
Iamque dies geminus bis sex geminaverat horas,  
Cum venere decem Pesulano monte carine,  
Que Pisis fuerant augusti tempore misse  
80Ad quoscumque tenet latos Provincia fines.  
His inerat clarus cum consule Vido Dodone,  
Ordine levita, trivii ratione peritus,  
Illius ut patrie traherent ad prelia gentem.  
Ethera carpebat solito molimine Phebus,  
85Et splendor solis nondum tenuaverat umbras,  
Cum data signa sonant iussos motura recessus.  
Iusserat antistes ponto dare verbera classem,  
Ac Barchinonam recto procedere cursu.

[p. 26]

Iussa probant omnes, nec inertī scandere passu  
90Naves incipiunt, quos non sua vota retardant.  
Sed velud examen per apertas advolat auras  
Quando cupit patriam mutare locumque domumque,  
Sic Pisana manus, rapidis aquilonibus usa,  
Remige quam celeri dictam properabat ad urbem.  
95Solis ab occasu modicum porrectus ad equor,  
Defessas solito qui frangit et accipit undas,  
Mons Iudeus, ibi plana divisus ab urbe,  
Non euris puppes calidisve tuetur ab austris;  
Cuius ab Hispana facie ratis appulit omnis.  
100Ut terras subeunt Latie reliqueque carine,  
Litus ad usque tuas agmen navale tenebat,  
Lubricaris, aquas. Ripe cecidisse feruntur,  
Tanta premebat eas magne violentia classis.  
Hic, ubi mutavit lites concordia pace,  
105Adveniunt sancti celeberrima festa Mathei.  
Tota nocte sonant tunc tintinabula cuncta,  
Vota vovent omnes, precibus votisque Tonantem  
Sollicitant, cuiusque colunt sollempnia sanctum.  
Candelas tunc quique suas in cuspide ponunt,  
110Aut ubi lux clare populo videatur ab omni.  
Tertia lux aderat cum planum possidet equor  
Ventus, quem boream nequeas eurumve notare;  
His medius fuerat. Tundunt sua pectora naute,  
Totque dies vacuos cum noctibus ire queruntur.  
115Iamque, die medio, sublimis in ethere Tytan  
De medio cursu terras spectabat et undas,  
**Cum Catalanensi de litore classis abibat.**  
Quos fremitus prebere solent stridentibus alis

[p. 27]

Treicie volucres resonantes cantibus altis  
120Agmine cum facto repetunt alias regiones,  
Non alios Pisana manus, clamore sequente,  
Exagitando suos et candida vela parando  
Solvendoque rates, summis cum vocibus edit.

Quattuor insignes tunc precessere carine.  
125Signiferi Francardus erant rectorque Pyrenes.  
Ordine consequitur renovato cetera classis.  
Lux abiit, nox atra subit, qua denique lapsa,  
Vel media, vel plus media, contraria retro  
Flamina vela dabant; qua causa previus heros  
130Ad Tramaricis sua flexit carbasa litus.  
Inde Terragonam petit ac deserta Salodi.  
Hic zephirus perfringit aquas et fluctuat auster,  
Pervia. Sed zephiro plus sunt sinuantia saxa.  
Partibus unda tribus circumdat pontica rupem,  
135Arbustis tegitur brevibus que spectat ad eorum  
Planities, alte rupis de parte levata.  
Regis in hac Karoli dicuntur castra fuisse,  
Cum duro quondam certimine stravit Hyberos;  
Hic hyemes Franci tolerasse feruntur et estus,  
140Quando prestanti ceperunt robore terram.  
Post lapse noctis spatium lucisque sequentis  
Tempora consumpte, qui primus adhesit in illis  
Saxis signa dedit vigiles quos gesserat ignes,  
Ne foret incertus locus hic dubiusve carinis.

145

[p. 28]

Hic postquam cunctis lux exivit edita terris  
Et latices hausere viri, conscendere pontum  
Incipiunt; vitreas velis remisque procellas  
Mota secat classis; iam terra relicta videri  
Non clare poterat, cum montibus abdita celsis  
150Cumque, labante die, subiere crepuscula noctis.  
A recto cursu non recta retorxerat aura  
Vela; laborantes turbantur in equore naute,  
Et se conclamant invites ire Dianam.  
Interea noctis tenebris aurora remotis  
155Clara resurgebat, cum turbida nubila venti  
Ducere ceperunt ab ea qua labitur hora  
Publica lux mundi: mox flectere vela Salodon  
Plangentes satagunt, tantus vehit impetus ipsos.  
Huc simul ac venere rates iam nocte propinqua,  
160Prosiluere viri latices haurire recentes.  
Ecce Mohabite pedibus vectantur equinis,  
Ut solet a nervo dimissa venire sagitta  
Quando suum Parthus sinuat violentius arcum,  
Qui captos pariter capientes fluminis undas  
165Ad proprios longo duxerunt calle penates.  
Sed timor Alphee gentis de nexibus ipsos  
Eripuit, rigidos qui concutiebat Hiberos.  
Ergo per eventum, quoniam male contigit illis,  
Iussio fit reliquis ne progrediantur inermes.  
170Dumque moram faciunt vacuisque vagantur in agris  
Agmina, murmur erat. Lucenses denique turbe,  
Dum pelagus tolerare minus fluctusque valerent  
Et nimium vellent sociis famulantibus uti,

[p. 29]

Unaquaque die populum replere querela.

175 Tunc Pisanus Ugo venerabilis archisacerdos  
Cum dextra pariter sublimia protulit ora,  
Qui tali populis sermone silentibus inquit:  
" Sola Dei bonitas, qui cuncta gubernat habetque,  
" Pisanos cives tantos animavit ad actus,  
180" Expertique suos nullos ad bella vocabant.  
" Nullus ad ista fuit toleranda venire coactus.  
" Sponte petebatis nobis, gratisque dabamus  
" Quesitas vobis, non vilia munera, naves,  
" Et ratibus vecti socii veniendo fuistis.  
185" Dicite, Lucenses, si quis vos forte coegit.  
" Quippe nec inviti voluistis ad ista venire,  
" Unde nec invitos quisquam retinere valebit.  
" Pisanos solos discedere nempe vetamus,  
" Non aliis prohibentur equi, non victus et arma.  
190" Accipiant ea quando volunt, sanique recedant,  
" Securosque petant ductores, hique dabuntur,  
" Cum quibus Italicos poterunt pertingere fines ".  
Ut memoratus herus post talia dicta resedit,  
Taliter incepit Vido supra memoratus:  
195" Cum Deus in cunctis preponi debeat actis,  
" Nec pietas nec amor pietatis habetur in ullo  
" Qui pro mundano tantum contendit honore.  
" Certet honor mundi, certet sapientia quenam  
" In mundi rebus Domini simulavit amorem,  
200" Pretulit atque Deo perituros semper honores.  
" Unde Dei vestras cernendo potentia mentes,  
" Contra quem vestrum toto fuit agmine murmur,  
" Hunc dignum vobis largitur temporis usum.  
" Hebreis populis murmur fuit instar ad huius,  
205  
[p. 30]  
" Quando memorabant repletas carnibus ollas  
" Et cuncta simul dilecta que grata que multum  
" Fercula, Niliacis quibus utebantur in horis.  
" Nam cuperent sevi potius iuga ferre tyrampni  
" Servilique magis sub conditione manere,  
210" Quam prohibere gule vicium dapibusve carerent.  
" Ille vetus populus residet sub pectore vestro,  
" Illius et mores animosque viasque tenetis.  
" Vulnere de tanto qui gestit habere salutem,  
" Peniteat voluisse malum properanter iniquum.  
215" Desipuit, quicumque fuit, ceciditque retrorsum,  
" Magnum nempe scelus nostro commisit in evo.  
" Quod teneamus eum quisquam fortasse queretur.  
" Preter Pisanos, quicumque recedere querit  
" Quando libebit eat, sua tollere non prohibetur,  
220" Nulla recedenti sane violentia fiet.  
" Ad patrios igitur cum venerit ille penates,  
" Et medius turbe claros narraverit actus,  
" Hoc de se vero poterit sermone referre,  
" Quod numquam vidit quos tantum fugerit hostes.  
225" Nos mare, nos ventos pondusque feremus aquarum  
" In Domini factis, nec habebimus inferiores  
" Militie socios, quos Gallia tota sequetur;



" Namque, favente Deo, venient multo meliores  
" Una nobiscum belli superare labores ".  
230Tunc Vilielmus ait dominus montis Pesulani:  
" Hos discedentes numquam doleatis abire.  
" Pro quocumque viro, qui nunc fortasse recedit,  
" Quattuor ob pugnam dabimus non deteriores  
" Qui pro sex horum poterunt tolerare labores ".  
235Surgens Henricus post hec Vinithone creatus  
Ortatur cives bellum firmare, priusque

[p. 31]

Una cum patribus sese iurare fatetur.  
Dicta fides sequitur, iurant equaliter omnes.  
Iam secus occasum Phebi clarissima lampas  
240Candentes vitreo tinguebat in equore flammis.  
Nox ea consiliis est postquam tota peracta,  
Et Phebo radiante dies iam clara micabat,  
Ecce recedentes equitum peditumque phalanges,  
Dimissis ratibus, proprias certantur ad edes.  
245Italice redeunt, dimittentesque Salodon  
Inmeritis referunt convivia plurima nautis.  
Preterea factos habiles ad carbasa cantus  
Et quoscumque solet sociis in puppe referre  
Navita sermones deridet rustica turba.  
250Interea quod hyems variaret sepius auras,  
Illeque perpaucis ratibus tutamina portus  
Prestat, et ignote non est fiducia genti,  
Ad Barchinonam classem deducere cunctam  
Constituunt, hyemare simul meditantur ibidem.  
255Festa dies aderat Domini de nomine sumpta,  
Prebebatque leves flatus lenissimus auras,  
Quo Latie puppes use cum remige ventis  
Urbem navigio celeri tenuere Pyrenam.  
Post ubi Pisanis fuerat iam copia terre,  
260Exonerare rates properant; pars maxima quarum  
Sistitur in terris, trahitur quoque luce sub illa.  
Nox quascumque sequens liquidis invenit in undis  
Intolleranda feri ponti facit ira solutas,  
Nec potuit requies prius equoris esse procellis  
265Quam sexagenas vis fregit pontica naves.  
Hinc turme flebant, presul patresque dolebant,

[p. 32]

Et pro posse suo non fractis subveniebant  
Navibus, in siccam donec traherentur arenam.  
Non alio luctu vidui gemuere Sabini,  
270Cum sibi dilectas detraxit Roma puellas.  
Inter tristitias autem quas forte ferebat  
Alpheus populus improvisosque dolores,  
Non oblitus erat quicquam de rebus agendis,  
Nec potuit clare mentis postponere sensus.  
275Ligna legi iussit que congrua navibus essent,  
Ac tabulas quas dira maris proiecerat unda.  
Ingenium docti populi mox tecta ratesque

Nocte dieque parat, complere videlicet illas  
Omnimodis satagit quas fregerat equoris ira,  
280Atque modis paribus turrets, tormenta per omnem  
Constituunt campum, Balee factura ruinam.  
Terque decem Pisas sutuuntur adire biremes  
Per quas incepto reparentur robora bello,  
Nisibus ut totis classem clarosque replerent  
285Militie numeros note per secula Pise.  
At Barchinone quecumque relicta fuerunt  
Se diviserunt per plures agmina terras.  
Pars campum retinet, pars altera venit ad illos  
Quos habuisse datur supra Provincia fines,  
290Atque Pesulanum montem venisse Levani

[p. 33]

Gerardum comitem, clarum virtutis honore,  
Constat, militie Gotis per facta notatum.  
Istic bellorum Vallandus splendidus actu,  
Filius Ugonis Petrus et Rolandia proles  
295Barucique vigor nec non Vivianus et Abbas  
Dogmata militie monstrant incognita Gotis.  
Multi Nemausas, plures veniunt Arelatem,  
Inveniuntque piam gratamque per omnia gentem,  
Pisanas acies miro que fovit amore.  
300Hic Ildebrandus Poppus transire volebat  
Cum scapha Rodanum, sed equo dum forte sederet,  
Delectavit eum puerorum cernere ludos,  
Et cum quesitum lapidem mississet in illos,  
Calcar equum tetigit, qui, dans in flumina saltum,  
305Lucensem iuvenem rapidus submersit in undis.  
Non lacrimae fuseque preces valere cadenti.  
Mortuus huius equus cum tractus ab amne fuisset,  
Pisani iuvenes equitem traxere necatum.  
Qui socium postquam largis flevere querelis,  
310Antistes clerus populusque valens Arelatis  
Intumulare virum summo curavit honore.  
At vice qui comitis Pisana presidet urbe  
Ugo; militie cui prebent singula laudem,

[p. 34]

Agmine qui toto vitam servavit honestam,  
315Astarum ludis et cursibus usus equorum  
Ac preponendo vincenti premia cursus,  
**Pisanos equites tractabat more Quiritis,**  
**Egregiumque virum Catalonia tota frequentans**  
Sardanieque comes celso celebrabat honore.  
320Consulis Henrici bonitas nec non reliquorum,  
Iurgia sive scelus non impunita relinquens,  
Iustitiae normam servavit in agmine toto.  
Quippe sibi gnari socii dum forte faverent  
Omnibus equa dabant placidi moderamina iuris,  
325Constituuntque viros totum vigilare per agmen  
Qui servare queant nocturno tempore naves.  
Bisque decem servant Balearica regna carine,

Paganam rabiem validisque viribus urgent,  
Et titubare feri faciunt fera corda tirampni.  
330 Si bene belligeras pensent nova secula Pisas  
Per mare per terras geminas extendere vires,  
Hoc Pise faciunt Romam quod utramque deceret.  
Quarum signa ferus populus dum spectat Hyberus  
Ingemit, atque metu visi consumitur hostis.  
335 Castraque custodit Pesulani montis amator.  
Ille prius patrias remeare refutat ad edes,  
**Quam sciat an ob rem seu frustra sumpserit arma.**  
**Hoc Catalanenses concussit inedia terras**  
Tempore. Pisani, solitis nil strictius usu  
340 Sumptibus, inventos gestantes undique victus  
Argenti pretio varia quoque merce parabant.  
Barchinonenses larga bonitate fovebant,  
Et solabantur inopes mercamine fines.

[p. 35]

At presul, custos sincere religionis,  
345 Ne sibi commissi caderent vigilanter agebat.  
Ergo diem nactus gratum tempusque loquendi,  
" Arboreas ", dixit, " postquam perceperat escas,  
" Letalis pomi cum sumpsit ab hoste saporem  
" Ille vetus genitor, paradisi menibus illum  
350 " Iussit abire Deus, cuius sententia vindex,  
" Hoc exosa nefas, pepulit dampnando superbum.  
" Omne genus vicii vicio processit ab huius,  
" Scilicet invadens hoc ordine posteritatem.  
" Intrat in has tenebras mundane gentis origo,  
355 " Primus homo; natos, hinc quos sibi fuderat Eva,  
" Livor agit; fratris ferit impia dextra fratrem,  
" Qui cadit; ante Deum clamat vox sanguinis eius;  
" Solivagus Cain silvas agrosque pererrat.  
" Ast subit astrigeras sedes iustissimus Enoch.  
360 " Iustus post illum Noe cum fecerat archam,  
" Diluit omne solum nimiarum pondus aquarum.  
" Unde cessarunt: octavus prodit ab archa  
" Tunc solus iustus: sunt gentes multiplicatae:  
" Post patriarcharum fuit ordo, deinde prophete,  
365 " Et tamen infernas nemo vitaverat edes.  
" Unde Dei pietas, hominum fera funera cernens,  
" Ut salvaret eos emisit ab ethere natum,  
" Et ne vana forent ea que sacrata caneant  
" Ora prophetarum, celi rex est homo factus.  
370 " Sic hominum factor sumens de viratine carnem  
" Serviles habitus hominum portavit ad usus,  
" Perque suam mortem cum crimine morte necata,  
" Captivas animas de gurgite traxit Averni.  
" Hac serie Domini salvavit gratia gentes,  
375 " Venit et in cunctam benedictio posteritatem.  
" Cuius apostolico dum presidet agmine Petrus

[p. 36]

" Ob fidei sacre confessam credulitatem

" Esse pius meruit celestis claviger aule.  
 " Ille tenet claves qui rexit in equore naves.  
 380" Claviger ille pius puppis doctusque magister  
 " Vos in nave sua mundana per equora portet  
 " Incolumes, puppisque sue vos esse ministros  
 " Remigio dignos imploret Cunctipotentem,  
 " Ut possitis eos tutos ductare per equor  
 385" Gurgite quos sacro sacrum baptisma piavit.  
 " Ergo docete viros kari pia dogmata fratres,  
 " Ac monitis sanctis a criminibus prohibete,  
 " Ut valeatis eos ad celica ducere regna,  
 " Deficiat vobis ut numquam celica merces,  
 390" Quam Dominus solis concessit habere beatis.  
 " Exemplo Christi, cuius regit omnia virtus,  
 " Captivos fratres, quos barbarus opprimit hostis,  
 " Liberet a sevo fratrum pia cura tyrampno.  
 " Fratribus et Domino quantum debetis amoris  
 395" Premonuit Petrus cum precessore magistro.  
 " Pro Petro Christus cunctisque fidelibus extat  
 " In cruce confixus, pro quo Petrus in cruce tensus.  
 " Fratribus unde suis succurrere nemo recuset.  
 " Fratres quippe suos Iudas patriarcha, nepotem  
 400" Abraham dilectum de nexibus eruit hostis.  
 " Hi quibus est licitum feriant mucronibus hostem.  
 " Vos hominum factor sevo defendat ab hoste ".  
 Que modo sunt scripta sunt pontificalia dicta:  
 Flos levitarum vir nobilis et bene carus  
 405Ista satis melius querenti narret Obertus.

### 3. Libro III

[p. 37]

Quem colit interea tellus Balearica regem,  
 Nazaredeolus Burabe, perterritus istis  
 Confususque novis, in cetum convocat omnes  
 Causas maiores per quos tractare solebat,  
 5Consilium quorum plano sermone requirit,  
 Sive Moabitis obtarent tradere terram,  
 An cum Pisanis aliquod coniungere fedus.  
 Respondere viri soliti maiora referre,  
 Et qui noscuntur aliis precedere sensu:  
 10" Turba sumus famulique tui, quidquidque videtur  
 " In ratione tibi constantius eximiumque  
 " Nos sine lite sequi confestim disce paratos.  
 " Respice nulla minus populum quam bella volentem,  
 " Sedula velle suo tua gens in pace maneret.  
 15" Hec nam culpa gravis dedit orrida scandala nobis.  
 " Undique gauderent Baleari subdita regno,  
 " Si cum Pisanis nos fedus habere daretur.  
 " Inque Moabitis nobis fiducia dare  
 " Non bona speratur, tantum convitia possunt,  
 20" Quos tolerare gemunt Hispane gaudia terre.

" Respice Dertose quid agant, quantaque Dianam

[p. 38]

" Clade premant. Nostras miseratus mente querelas  
" Accipe. Captivos omnes perquire, reserva,  
" Et melius tracta, quia pax et vita per illos  
25" Ac regnum pariter tibi concedetur honorque.  
" Ast his non habitis, numquam sedabitur hostis.  
" Christicolis quoniam, qui pro pietate laborant,  
" Kara magis essent captorum corpora fratrum,  
" Quam videatur eis regnorum copia centum ".  
30His habitis verbis, regis precordia diri  
Contremuere metu. Captivos protinus omnes  
Precipit inquiri passim veteresque novosque.  
Tunc de Bonomuli rate, quos sors, ventus et unda  
Vexerat invitos, curat tractare decenter.  
35Pisanis etiam cartam pro tempore scripsit,  
In qua pontificem, patres, populumque salutat.  
Qui, quamvis prorsus diversum mente retractet,  
Ditia verba tamen mittens, nil supplicat hosti,  
Sese constantem sine prodicione fatetur.  
40Ampurie comitem testem narrantibus addit,  
" Hyerusalem " dicens " peregrino dum petit actu

[p. 39]

" Conspicue fame notus comes Ampuriensis,  
" Eius illesam servavi federe terram.  
" Nullum quippe virum bello seu pace fefelli.  
45" Si Pisana manus mecum vult pacis habere  
" Federa, continuo captivos reddo, measque  
" Dono paratus opes. Linquat mea regna, suasque  
" Inpensas reddam pariter pretiumque laboris.  
" At si forte suis armis contendere mavult,  
50" Bellandoque meam putat armis vincere gentem,  
" Usu communi cum se defendat ab urbe  
" Urbs, nichilum faciunt eius mea regna labores ".  
His intellectis cartam piscina recepit.  
Et respondetur brevibus sermonibus illis,  
55Qui tales apices et talia scripta tulerunt:  
" Nil tolerare mali portantes nuntia lex est.  
" Communis iuris debemus moribus uti.  
" Non possunt iungi cum vestro federa rege,  
" Nec fas est nobis ullam sibi reddere pacem,  
60" Ni prius in vestras conduxerit agmina terras  
" Rex, qui, cuncta videns, iudex cognoscitur equus.  
" Illuc decernat iudex pius ille patenter  
" Inter nos, cunctos hominum qui iudicat actus ".  
Preter eas, alias fertur mississe lituras,  
65Queque suis notis mitissima verba reportent.  
Privatis etiam multum promittit in illis,  
Albicione satum verbis commendat amicis.  
Utque memor maneat rogitabat federis eius,  
Quod cum Mugeto genitor retinebat, avusque  
70lunxit, et ex multo tenuit iam tempore Petrus.

[p. 40]

Rex fuerat Balee Mugetus rexque Diane.  
Invasit Sardos rabida prestantior ira.  
His igitur propere violento Marte subactis,  
Omnia cum plano tenuit montana tyrannus.  
75 Huius Pisanus populus mox concitus actis,  
Conscendit celeres sulcantes equora naves.  
Tunc non erubuit quisquam de nobilitate  
Viribus equoreas remos urguere per undas:  
Si levis extiterat vel tota remanserat aura,  
80 Optatos cursus robur commune replebat.  
Qualiter accipitres pavidas peciere columbas,  
Et sicut Libici poscunt armenta leones,  
Tunc cum longa fames in viscera serpit eorum,  
Sic sic accelerant, sic poscunt bella frementes,  
85 Quos Pisana manus sevos ductabat in hostes.  
Sardinie postquam potuit de litore cerni  
Eximius populus Pisana ductus ab urbe,  
Rex cum gente sua terras fugiendo reliquit.  
Heroes igitur, suscepta laude triumphi,  
90 Victores redeunt, fines intrantque paternos.

[p. 41]

Post illum vero Mugetus concitus annum,  
Perduxit Mauros in regnum Calaritanum,  
Et numero primos excedunt posteriores.  
Robora murorum, quo scilicet edificante,  
95 Subsidiabantur Sardorum corpora muris,  
Quique die tota latices et saxa ferebat,  
Impositus muro murum pro caute replebat.  
Multi Sardorum, quos presserat ira tyranni,  
Tam seve mortis penas habuisse putantur.  
100 Hinc Pisanus honor, vires animosque resumens,  
Non dubitat vitreas iterum transire per undas.  
Post ubi Pisani terras camposque tenebant,  
Rex fugisse datur. Multis nam Marte peremptis,  
Barbarus abscessit capto cum coniuge nato.  
105 Erepti Sardi iugulis tutique fuerunt.  
Indeque tota manent Pisanis subdita regna.  
Sardinie docuere senes quecumque retexo.

[p. 42]

Quesiti Sardi non hec tibi vera negabunt.  
Hunc regis puerum, qui captus dicitur esse,  
110 Pise victrices regi misere Lemanno.  
Huius avum Petri princeps generosus amabat,  
Qui dedit Alpheo, quesitum munus, Alanta.  
Reddidit hic patri, karissima munera, natum:  
Albicio quare successoresque vocantur  
115 Mugeti fratres successorumque suorum.  
Ergo quisquis habet regum Balearica sceptrum,  
Ex hoc affirmat se fratrem seminis huius:  
Albicione satus Petrus, viget eius origo,

Pisanos ornans probitatis imagine cives.  
120Talia cur memorem Petrus et Balearicus auctor  
Causa fuit. Sed nunc ad propositum redeamus.  
Instabant Martis redeuntis tempora mensis,  
Cum fines Ebusi misse subiere carine.  
Mox avidi de plebe viri predeque cibique  
125Intraverant casas, nec scuta nec arma ferentes.  
Dumque saraceno satiant sua corpora musto,  
Dum passas uvas, dum gaudent mandere ficus,  
Nota per arva loci veniunt equites Ebusini.  
Incautos homines per devia rura vagantes  
130Detruncant gladiis, vario quoque vulnere perdunt.  
Tunc Petrus Ascensus, gestans sibi credita signa,  
Audaces socios in dirum concitat hostem.  
Ante rates certamen adest. Pugnant Ebusini:  
Huc equites peditesque ruunt fluctuque resistunt,  
135Invictosque viros totis conatibus urgent,

[p. 43]

Et non permittunt pedibus contingere litus.  
Insula parva iacet, non longe solis ab ortu,  
Que brevibus scopulis Ebusinam respicit urbem.  
Illa revertentes recipit de marte galeas.  
140Sed, recreante parum iuvenilia membra quiete,  
Indubitata viri repetunt sinuamina portus,  
Inventasque rates capiuntque fugantque trahuntque.  
Captos inde viros, Ebusina plebe vidente,  
Ad sociosque ferunt manibus post terga ligatis.  
145Insula stat pelago, partes ea respicit austri  
Adversum Libicos, cui Frumentaria nomen.  
Hanc Latii petiere viri properanter, et illic  
Ceperunt victus placide solatia prede,  
Perpinguesque boves, quibus et vesci potuissent,  
150Ni pia Christicolis prohiberent tempora carnes.  
Lustrantesque locum, quo gens inamata latebat,  
Abstractos caveis Ebusum duxere ligatos.  
Hic tunc Lamberto nec non Erithone iubente,  
De duodenorum numero qui prememorantur,  
155Ascensus Petrus naves divisit, et una  
Solis ab occasu cepit committere pugnam.  
Cum sexagenis igitur comitantibus illum,  
Signifer Ascensus, properans exire carinam,  
Hostiles cuneos multo cum robore poscit.  
160Tunc Arduinus generosus Luciniensis  
Exortans socios in prima fronte resistit.  
Ast Ebusitanus iaculatus signifer astam  
Hosti terga dedit, socios fugiendo relinquens,  
Nec lesit quemquam iaculum tellure relictum.  
165Luciniensis eum saxosa per arva sequutus,

[p. 44]

Hunc cum haud varo iugulavit protinus ense.  
Rursus accedunt equites aciesque pedestris  
Altera, que furtim post grandia saxa latebat.

Tunc Eritho consul sociis adiutus in hostes  
170Fertur, et obstantes telo gladioque repellit.  
Sic perturbati cuncti fugiunt Ebusini,  
Quos fera bella gerens victor, Lamberte, fugasti,  
Ut fugiunt aquilas celeri levitate columbe,  
Et sicut pavidi fugiunt astilia pisces.  
175Urbis ab arctoa tua pugnant agmina parte,  
Sacriligosque petunt sternuntque viriliter hostes.  
Dumque tuum validis curvares viribus arcum,  
Per Mauri pectus missam transire sagittam  
Tu facis. Ille ruit, vitam cum sanguine fundens.  
180Ducitur in longum tendens a litore collis,  
Qua Petrus Ascensus Maurorum terga premebat.  
Passibus haud lentis capit hunc gens barbara collem,  
Cui plus quam deceat via longa videtur ad urbem.  
Sed dum Pisanos ictus et vulnera sentit,  
185Saucia cristati transcurrit robora montis.  
Pisani cunei, dum totis nisibus instant,  
Innumeros Mauros diverso funere sternunt.  
Iam quoque turba sequens ad portam venerat arcis,  
Quam locus ille gravis tepido demonstrat ab austro.  
190Hic miles quendam, quem Luciniensis alumpnus

[p. 45]

Straverat, obstantem nudo transverberat ense.  
Armiger hic Erithonis, fortiter hostibus instans,  
Occubuit moriens, saxi prostratus in ictu.  
Inde, Saraceni postquam cum turribus altis  
195Muros conscendunt et grandia saxa remittunt,  
Agmina tuta petunt que sunt sita tecta sub urbe,  
Solis ab occasu, qua plebs residebat inermis.  
Inde viros puerosque trahunt matresque nurusque,  
Pannos et vestes de captis eruta tectis,  
200Ruriculasque domi tuta statione morantes,  
Et de captura modicum vel nil meditantes,  
More gregis pecudum captos ad litora ducunt.  
Martius ex toto cursum compleverat, atque  
Aprilis fuerat media iam parte peractus,  
205Cum, tepidis zephyris sevum. Volventibus equor,  
Carbasa convertunt naute quo vota ferebant.  
Quos dum precipites vitree vehit impetus unde,  
Ventus anhelantes Balee perduxit ad horas,  
Suspenduntque leves remis super equora naves.  
210Interea Baleam geminas misere galeas,  
Uberto genitus Lambertus consul in illis,  
Que celeres adeunt portum de nomine Pini,  
Semimaremque vident servantem litora regem,

[p. 46]

Qua veniant causa muliebri voce rogantem.  
215Ast equites peditesque manent ad litus, et arcus  
Incassum tentos toto conamine flectunt.  
Ipse iubet cessare suos, et ledere nullum,  
Alpheosque rogat tutos exire carinas.



Consul ad hec: " Est vestra fides male credula nobis,  
220" Possumus unde minus nudis confidere verbis.  
" Nos damus, ecce, fidem, quam non retinemus inanem,  
" Quaque data nostram tutus intrare carinam  
" Rex poterit, sua verba loquens, sanusque redire ".  
" Iustius ", ille refert, " est regis credere dictis.  
225" Qui si quem iubeat solo sermone venire,  
" Tutior ire potest, cum constantissima regum  
" Singula verba fluant: dictis incredula vestris  
" Cernitur esse fides, quorum temptavimus artes.  
" Si tamen e rebus quicquam vos sumere nostris  
230" Vultis, in hoc portu tuta statione manete,  
" Queque dari vobis mox regia cura iubebit ".  
" Ista suum ", dixit consul, " vocat insula regem  
" Te. Plures nostri stant sub moderamine iuris,  
" Et Balea melior que vis consistit earum.  
235" Vestra fides nichil est; Machamatus ebrius ipsam  
" Edidit; at nostram sanctorum gloria Christus.  
" Unde satis melius nostris se credere posset  
" Simplicibus dictis quis cui sanissima mens est,  
" Quam iuramentis valeamus credere vestris ".  
240Rector ad hec Balee: " Nimium dubitare videris,  
" Et trepidas vano te concutiente timore.  
" Sed ne turbentur bona que tractanda videntur,  
" Et timor absistat, saltem per scripta loquamur,

[p. 47]

" Ut notum postquam fuerit quod poscitis ipsi,  
245" Hoc complere queam quod gestit vestra voluntas,  
" Quatenus esse boni semper valeamus amici ".  
Consul agit: " Socius, scriptor quoque longius absunt.  
" Ibimus, et nostros trutinantes pectore sensus,  
" Ambo notis dabimus, quodcumque decebit utrumque ".  
250Mox efferre rates et in ordine ducere remos  
Precepit nautis validasque ferire procellas.  
Sicut aves, quas penna levis portare per auras  
Concessa levitate solet, sic accelerantes  
Ad reliquas certant gemine remeare carinas.  
255Quas postquam pelagi solitus labor egit in unum,  
Intravere tuos tutos, Capraria, portus,  
Inque Polentinos lux evehit altera fines  
Heroes Latios. Vallis didicere coloni,  
Qui fugiendo suas spoliarunt victibus edes,  
260Linquentes vacuum gregibus pascentibus arvom.  
Hinc Latios iuvenes invita Minorica quamvis  
Suscepit. Predam sparsi per rura gerebant.  
Hos contra veniunt equitum peditumque caterve,  
Inque fugam versos ad naves usque regirant,  
265Et mittunt lapides in eos densasque sagittas,  
Et non permittunt portu remanere quietos.  
Defuit esca viris Latiis, pastumque dederunt  
Hee quas rus habuit vulse radicitus erbe.  
Utque famem nequeunt equites plus ferre marini,  
270Ad Barchinonam statuunt convertere cursum.

Nam suspectus erat de prodicione tyrampnus,  
Quare mens ad eum redeundi nulla manebat.  
Eolus interea dirum de carcere ventum

[p. 48]

Solvit et inमितem, nomen fuit Africus illi,  
275Albentes faciens has quas crispaverat undas.  
Intumuitque fretum: turbaverat aura profundum,  
Divisitque duas tempestas ipsa galeas.  
Quassata in toto fleverunt agmina campo.  
Ascensus Petrus nauclerius extitit isti,  
280Filius Alberti fuit Ugo preditus illi,  
Que Mare manducans vulgo fuerat vocitata,  
Cuius presculptum gestabat prora draconem.  
Portibus ast alias susceperat insula puppes.  
Tempus ut admonuit, venti residente furore,  
285Pertemptant iterum vitreas sulcare procellas,  
Nam transire fretum communia vota monebant.  
Postquam leta dies illos ad litora duxit,  
Narrantes casus tantique pericla laboris,  
Nuntia victrices mittunt felicia Pise,  
290Que cursu propero bine duxere galee,  
Tripudiare quibus lete cepere phalanges.  
Unam, ni fallor, tecum, Maceline, gubernat  
Consocius Guido qui Presbiter est vocitatus.  
Rexerat ast aliam laudati cura Baronis.

**295Ad Catalanenses postquam ratis utraque ripas**

Venerat, et belli narrantur utrimque paratus,  
Venturosque cito socios dixere liture,  
Romana missus venit legatus ab urbe  
Boso, pater sancta reverendus religione,  
300Et domino pape virtutum culmine carus.  
Tunc et apostolici postquam benedictio cunctis  
Dicta fuit populis, tendunt ad sydera palmas,  
Et dominum celi pleno cum pectore laudant,  
Qui dignetur eis tantum salvare magistrum  
305

[p. 49]

Militie, per quem benedictio celica fertur,  
Ac coniungit eis socios sancti famulatus.  
Non aliis votis patres populusque Quiritum  
Aspexere suos civilia iura ferentes,  
Lata decem tabulis cum sunt primordia legis.  
310Frigoribus lapsis, redeunt ad leta calor  
Tempora. Lene fretum placida dstringitur aura,  
Et valide classis pars Sarni ducta per undas  
Advehitur, propriis transcurrens nisibus austros,  
Atque resistentes superans cum fluctibus auras.  
315Urbs igitur Ianue celeres mirata paratus,  
Livida demisso spectabat carbasa vultu.  
Massilie tandem levibus comitantibus auris  
Intravere sinus. Misso post terga Lirino,  
Bis quadraginta sulcantes equora prore,  
320Iam quas precipites Rodani vehit impetus undas  
Scandere festinat multo cum robore classis.

Divitiis Arelas pollens hanc sumptibus implet,  
Usque Magalonam rapidus quam propulit Heurus.  
Eolliis Boreas tandem procedit ab antris,  
325Et famulatur ei totus cum nubibus aer.  
Arripit unda rates, ventoque ferente secundo  
**In Catalanensi consistunt litore puppes.**  
Fratribus occurrunt fratres, natisque parentes,  
Amplexuque dato post oscula iuncta vicissim,  
330Quid cari faciant vite solatia querunt.  
Gaudia non fuerant matronis tanti Sabinis  
Cum precesserunt coram genitoribus olim,  
Natos Romulea gestantes gente creatos,

[p. 50]

Vota patrum natos quanta pietate tenebant,  
335Et nati quantum placidos strinxere parentes,  
Et quantum fratrum tenuerunt colla lacerti.  
Visibus Alphei carorum laetificati,  
Ducere robusto ceperunt gaudia motu.  
Cumque suo cursu maius vel iunius essent,  
340Ecce Dodo consul castris accessit et Atho,  
Quos cum tripudio cuncte videre cohortes.  
Sedis apostolice missas a patre salutes  
Constanti tum voce ferunt, seriemque laborum  
Qua tardi veniant dicunt et in ordine causas.  
345Tum cetum tenuere patres: papalia iussa  
Boso pater peragens precepit ab omnipotentis  
Invictique Dei, qui condidit omnia, parte  
Perque pii Petri sacrosanctos famulatus  
Et domini pape Paschalis in Urbe secundi,  
350Ut Christi famulos, per quos pia signa tulerunt,  
Quos baptisma facit Domini quoque regula fratres,  
Eruat a sevis fratrum pia cura catenis.  
Talia cunctorum, cetus turmeque probantes,  
Intravere rates pelagus sulcare paratas,  
355Quas tunc quingentas numerarunt scripta carinas.  
Presul Pisanus, quem maxima cura trahebat  
Ad captivatos acies perducere fratres,  
Vela dedit pelago, primus transitque Salodon,  
Hinc ad Dertose fluvium pervenit Hyberum,  
360Huius militie primus quia signa levavit  
Pisanosque duces tantos animavit in actus.  
Tota sequendo patrem classis comitatur euntem,

[p. 51]

Nongentos equites undosa per equora portans.  
Replet Hyberus aquis classem. Socialia pacta  
365Cum ducibus proceres firmant, firmataque iurant.  
Lapsaque iam fuerat paucorum meta dierum,  
Cum dare vela parant ventis aquilone levatis.  
Ardua sed postquam laborantes equora pulsant,  
Lenior ingressas pontum vehit aura carinas,  
370Nocte quibus tota cursus dedit illa secundos.  
Sol erat incipiens per iter conscendere celi,

Quando Colubrarem viderunt agmina montem,  
Cui, quibus est plenus, nomen tribuere colubre.  
Accelerant: latet hic, cum mox saxosa videtur  
375Insula, Tirenis que circum cingitur undis,  
Spectans Hesperium lapidoso vertice litus.  
Hanc Ebusum memorant. Urbi dedit insula nomen.  
Portus in hac magnus, magnum vicinia dicit,  
Qui valet innumeras spatiis servare carinas.  
380Cernitur Hispane de partibus esse Diane;  
Hinc tenet illa caput, quo fert sua plaustra Bootes;  
Pandit in occiduuum dextrum latus insula solem,  
Atque latus reliquum surgentis solis ab axe;  
Quique nec occasum nec prorsus spectat ad austrum,  
385Occiduas finem non recte gestat in horas,  
Cunctaque saxosi cingunt campestria montes.  
Germinat innumeras erbas cum fructibus arvum;  
Mel satis, et dulces fluitant e fontibus haustus,  
Ordea multa gerit, vites quoque terra feraces.  
390Finis ad occiduas qui non bene respicit horas

[p. 52]

Mille quater passus Ebusina distat ab urbe.  
Eximii colles, plani spectacula campi,  
Intrepidas arces et menia tuta dederunt.  
Unda sinum grandem, gelidam que spectat ad Arcton,  
395Queque superstat ei duplex dedit insula portum.  
Circumquaque fluunt latices e fontibus orti  
Dulcibus, erba viret, calami iuncique palustres.  
Celsior a medio porrectus in aera collis  
Exhimias altis habuit cum turribus arces;  
400Ardua sed triplices circumdant menia muri;  
Subsistunt muris fovee de monte cavate;  
Ista duodenas habuerunt menia turre.  
Arcus ab his quantum poterit portare sagittam  
Turrigeri stabant montano robore muri.  
405Dificiles aditus prebebant invia saxa.  
Hinc quantum forti bis missile mittitur arcu,  
Cernitur exterior descripte circulus urbis,  
Turribus et forti circumdata menia muro,  
Cuius fossa triplex inmania robora cingit.  
410Fossa redundat aquis, quas attribuere paludes.  
Urbis et in summo fuit arx a partibus austri,  
Mons foris equoree pulsatus viribus unde,  
Iuxta quem dederant largos sinuamina portus.  
Altera pars montis, quem nempe recisa videtur  
415Solis ab occasu, foveas descendit ad imas,  
Inde suburbanas descendens aspicit edes.  
Sed triplices fovee gelida non prorsus ab Arcto  
Usque tenent pontum, pontusque tuetur ab Euro  
Menia cum grandi posito super equora saxo.  
420

[p. 53]

Erectum paries saxum secernit ab urbe,  
Incipit a portu, protensus desinit illic  
Quo mons proruptus subiectas spectat in undas.

Turriger hinc murus summas ascendit ad arces  
Duplex, et triplici tutus munimine fosse.  
425Bozee flores et flores gentis Hybere  
Tutantur validis Ebusinam viribus urbem.  
Huius militie princeps a rege secundus  
Fertur Abulmunzer, fuerat cui tradita terra.  
Vir fuit ille ferox, captivus ab urbe Girunda,  
430Qui post se versus, Christi baptisma negando,  
Vernula fit Sathane, quo non crudelior ullus.

#### 4. Libro IV

Nox erat incipiens, precesserat Hesperus astra.  
Alphee venere rates. Ebusina iuventus  
Inter conseptos stabat densissima muros.  
Bucina repletur flatu, lituique, tubeque:  
5Tota sonat classis. Conclamant civis et hospes,  
Sed Latia superat clamor de gente levatus.  
Spicula crebra ferunt missos a menibus ignes.  
Phebus ab equorea postquam processerat unda,  
Clarueratque dies, populis pugnantibus aptus,  
10Circumstant acies, ponuntur in ordine castra.  
Plurima vallis habet tentoria, plurima collis.  
Transcurrit campos celeris Pisana iuventus,  
Invaditque suos non pigris gressibus hostes.  
Saxa volant ritu pluvie de turribus altis,  
15Tela sudesque terunt propiores menibus hostes.

[p. 54]

Dificiles aditus per dura pericula fosse  
Pisane subeunt acies, portisque sub ipsis  
Non trepidant gladiis duros concidere Mauros.  
Ardescunt animi. Pugnantes cominus instant.  
20Ictibus assiduis clipei galeeque teruntur.  
Nec prohibere valet torax penetrantia tela;  
Vulnus et interitus passim sanguisque redundant.  
Nox postquam veniens ferventia bella diremit,  
In sua Pisani redeunt tentoria fessi.  
25Sed remeante die, turmisque petentibus arma,  
Machina construitur, sapientum viribus acta  
Artificum, turrens feriens que dissipet altas.  
Tunc, aries cratesque simul sunt addita muris,  
Plena viris etiam per vallum vinea serpit,  
30Qui vario nisu perstringere robora temptant.  
Obsita stat garabis protectis pontica ripa,  
E quibus armate properant ad bella cohortes.  
Dant animi vires. Media Mars sevit in unda,  
Nec tenet unda viros. Medio stant agmina fluctu,  
35Innumerisque patent hominum discrimina telis.  
Lis geritur gladiis. Pugne furit anxius ardor,  
Turrigereque petunt muralia robora naves.  
Bartolot Anfossusque simul rapiuntur in undas,  
Nec vitant ictus, sed plana per equora Mauros

40Duriter obstantes iaculata cuspide sternunt.  
Huc Opitho, virtute potens, mox flectit habenas,  
Et Maurum peditem media transfigit in unda.  
Altus Parlasii Petrus atque Bono generosus  
Vido satus, iaciunt astas; mucronibus inde  
45Concidunt Mauros: densantur ab urbe sagitte,  
Arcitenensque sagax per visus figit utrumque.

[p. 55]

At de classe viri positum super equora murum  
Poscunt, et celsas invadunt agmina turre.  
Transiliunt fossas. Alii properantius addunt  
50Ad conscendendum muri super ardua scalas.  
Proiciunt lapides iaculantes tela sudisque  
De muris Mauri, Pisanaque robora pellunt.  
Tunc instant acies, donec sol fervidus ipsas  
Estibus accensas cogit sua castra subire.  
55Interea turrim faciunt, solitasque per artes  
Unaquaque die muros et menia frangunt.  
Arripit Alpheos belli violenta cupido,  
Et latas intrant pugnantem undique fossas.  
Tunc demum iuvenes subeuntes menia quinque  
60Maurorum cuneos animis violentibus urgunt.  
Hi contra iaciunt lapides et tela; fugaces  
Quattuor ex illis facti, transcurrere saltu  
Non dubitant aditus; quintusque remansit in illis  
Pipini natus, socii quem deseruerunt.  
65Quid faceret? vel cuius opem pugnando rogaret?  
Proiciunt lapides in eum de turribus altis;  
A scapulis murus, contra quem plurimus hostis,  
Figitur innumeris telis variisque sagittis.  
More viri pugnat quindenis natus ab annis,  
70In se conversos sternitque viriliter hostes.  
Dum tamen illorum nimius petit impetus ipsum,  
Corruit, et pariter perdit cum sanguine flatum.  
Innumeri subeunt membris puerilibus enses.  
Mauri letantur, socii stant cede dolentes.  
75Exercetque suos dum gens Pisana labores,  
Tormentum mirum labentis solis ab axe,  
Quod longo tractu muralia robora poscat,  
Fecit Oriciades. Simul et testudinis artem

[p. 56]

Actus in hac, aries murales sternere cursus  
80Nititur, et penetrat impulsu perpete muros.  
Ast Ebusitanis non est ad prelia dispar  
Ingenium. Totas dant in certamina vires,  
Dumque suas faciunt non equis viribus artes,  
Pisanos temptant penitus confringere nisus,  
85Dum, magni lapides, quos ardua machina portat,  
Inmensam certant muris conferre ruinam.  
Protegitur murus pannis latisque tapetis,  
Et turre habuere sui munimina restes,  
Fulcraque collate luserunt sepius ictus

90Molis, et opposite texerunt cetera crates.  
Sicut aves reparant nidos quos destruit aura,  
Cum tremulos venti vis concutit aere ramos,  
Sic Ebusitani muros ac menia cuncta  
Solliciti reparare student, presentia quorum  
95Assidue vigili servat sua robora cura.  
Fecerat in muro plures testudo fenestras,  
Cuius Oriciade formam construxerat astus.  
Iam quoque casuram credebant agmina turrem,  
Cum cessare iubent patres testudinis actus,  
100Electi donec iuvenes mittantur in illam,  
Qui captam teneant summis cum viribus urbem.  
Sancte, tuum festum, Victor, laudabile multum,  
Forte celebrabat mundus, Praxes super astra  
Quando levata fuit martyr virgoque decora.  
105Luce sub hac cursus medios iam Phebus agebat;  
Estus erat grandis; tecum rogittasse putatur,

[p. 57]

Celica turba, Deum Pisanus presul, et omnis  
Firmiter orabat magno cum presule clerus,  
Quatenus ipse suis pugnantibus auxilietur.  
110Divinas aures tantos audisse rogatus  
Creditor, et fusas lacrimas monuisse Tonantem.  
Deviat esse Dei quisquis tales negat actus,  
Et pro posse suo non laudat Cunctipotentem.  
Extemplo medium dum carperet ethera Tytan,  
115Mota fuit turris graviter, ceciditque patenter.  
Intremuit locus, et pulvis vicina replevit.  
Inconsumpta iacent mensis convivium. Fervet  
Prorsus ad introitum Latius seu Gallicus hospes.  
Ugo, qui Pisis comitum vice peditus extat,  
120Et Dodo Teperti clarus per prelia natus,  
Ac Cinithoniades animis decoratus et actis  
**Et Catalanensis quidam bene promptus in armis,**  
A portu pariter per portas ingredientes,  
Invadunt Ebusum, sternunt violentibus hostes  
125Viribus, et perimunt letis successibus illos.  
Qualiter armentum tygres per rura sequuntur  
Cum violenter eas ieiunia longa coercent,  
Haut secus heroum gladiis pagana fugantur  
Agmina. Tunc relique succurrunt undique turme  
130Nulli parcentes, sexus iugulantur et etas.  
Hinc aditum quendam retinebant Hismaelite.  
Maurus ibi pugnat atrox metuendus in armis,  
Et ferus accessus cunctis prohibere putabat.  
Ergit Ildebrandus in hunc Eufraxius ensem,  
135

[p. 58]

Cedentemque virum mirando recidit in ictu.  
Qui per rupturas intrarunt denique muri  
Barbara concidunt fugientum corpora ferro.  
Tunc percussa cadit gladiis Ebusina iuventus.  
Hic caput atque manus, illic sunt crura pedesque,  
140Quaque pedem faceres hominum prosecta iacebant

Eruta corporibus. Morientum milia calcant  
Belligeri cunei. Sed qui de cede supersunt  
Ascendunt medios inter duo robora muros.  
Altera turba ruens fugit ad sublimia saxa,  
145Que suprafati spectantia diximus equor.  
Inde ruunt partim, partim truncantur, et illinc  
Rupibus e summis salsas iaciuntur in undas.  
Hic malus est saltus quem Mauri tunc didicere.  
Qui non fugerunt, saxosis ictibus et non  
150Continuere manus, de muris precipitati,  
Undique confracti media iacuere platea.  
Declinat medios dum Titan ethere cursus,  
Pugnantesque viros et fervidus estus agebat,  
Urbs ubi prima fuit divino victa vigore,  
155Altera victores veniunt ad menia. Portas  
Et superos aditus perfringere marte laborant.  
Multisoni resonant variis umbonibus ictus.  
Saxa volant, misseque pluunt utrimque sagitte.  
Ortantur proceres pugnantes fortiter alas.  
160Utraque turba fremit. Penetrant ad sidera voces.  
Ascendunt geminas dum pugnant agmina turrets,  
Et superare putant reliquam velocius urbem.  
Accurrens Ebusina cohors violentius hostem

[p. 59]

Impetit, et saxis, telis sudibusque repellit,  
165Perque coherentes cogit descendere scalas.  
Postquam bella viris in nullo commoda prestant,  
Mox sua castra movent, et barbara tecta subintrant.  
Sed defunctorum ne corrumpantur odore,  
Traditur extinctus flammis crepitantibus hostis.  
170Postera lux oritur. Consurgentesque caterve  
Tendunt in reliquam studiis ardentibus urbem.  
Nocte dieque suas exercent fortiter artes.  
Lux octava redit. Turrets feriendo reclinat  
Machina. Testudo perfringit sedula muros.  
175Tum nox transierat vicine proxima luci,  
Aurore patuere fores, Phebusque redibat.  
Protinus ascendunt super altas agmina turrets.  
Barbara turba pavet, celsasque recurrit ad arces.  
Alpheus populus defuncta cadavera calcans,  
180Hostiles cuneos gladio prosternit et asta.  
Dumque satis properant super ardua ducere castrum  
Menia, Dominici sollers quod cura paravit,  
Telorum nimbi summa mittuntur ab arce,  
Sarnicolasque super volitant ingentia saxa.  
185Sed Christi pietas divinaque gratia quantum  
In se sperantes semper sustentat et auget,  
Humane nequeunt ad plenum dicere lingue.  
Eius enim facto, qui noscitur omnia posse,  
Victoris festo qui primam vicerat urbem,  
190Eius in octava meruit superare secundam  
Pisanus populus semper confisus in ipso.  
Victores tandem captum retinere laborant



Et servare locum. Patres deducere castra  
Circumquaque iubent: parent: sed et obsidionem  
195Menibus inclusis omnes vicinius addunt.

[p. 60]

Nulla quies cuiquam tenebris vel luce dabatur.  
Turres tormentis altas murosque petebant,  
Queque graves longe dimittit machina moles  
Menia celsa petens, portabat adusque fenestras  
200Cautes, internas sternendo sepius edes;  
Vicinusque malus, cui non erat agmine compar,  
Sublimem tractus crebro feriebat in aulam.  
Nunc ultra turres lapides portabat et infra,  
Et de sacrilegis faciebat sepe ruinam.  
205Talibus et reliquis populus Pisanus agebat  
Artibus, et duros temptabat vincere casus.  
Tam Vido Rubeus quam Barchinonicus heros  
Incassum missas non direxere sagittas.  
E contra Mauri bellantia sepe petebant  
210Agmina non parili facientes prelia dextra.  
Sevus Abulmunzer, super ardua menia demum  
Assistens, fractam defixo lumine turrim  
Spectabat tristis. Casu sinuaverat arcum  
Villano genitus; qui, mittens spicula contra,  
215Spectantem medio defixit gutture Maurum.  
Iurarat pridem per iura Machamatis ille  
Incolumem cuiquam se nunquam reddere terram.  
Tunc sibi subiecti suaserunt talia cives:  
" De iuramento nulla ratione teneri  
220" Te nuper facto fusi docuere cruores.  
" Sanus enim non est cui figunt spicula guttur.  
" Ergo tui compos citius fac deditionem,  
" Et te nobiscum pariter de funere serva ".  
Annuerat princeps dictis precibusque suorum.  
225Mittitur Alpheis ducibus qui nuntiet ista.  
Forma placet pacti Pisanis. Protinus illi,

[p. 61]

Nil dubitando, viri sine conditione dederunt  
Omnia seque, simul mortis terrore remoto.  
Tunc, pie Laurenti, mundus tua festa colebat;  
230Te, venerande, Deum placido monuisse rogatu  
Autumat Ecclesie populus, creduntque fideles,  
Cum vexilla super posuerunt agmina turres.  
Ter Domino laudes totum cantaverat agmen,  
Cornicinumque dabant voces lituique tubeque,  
235Tinnitusque pios resonantia signa tulerunt.  
Conscendunt proceres summas properantius arces,  
[Ac commune iubent spolium properanter in unum]  
Accumulare locum. Turres et menia cuncta  
Certatim sternunt avidi terreque coequant.  
240Transierant bis sex rapida vertigine menses,  
Et celer actus erat variis sudoribus annus.  
Tempus erat quo ferre soles, auguste, racemos,

Cum citius solito potarunt agmina mustum,  
Sedarantque patres ceptas cum litibus iras,  
245Quas predatorum tumidi movere furores.  
Vulgus ab introitu capte regionis, et ante  
Quam, populus quicquam superaret bellicus urbis,  
Collectam passim predam de rure trahebat.  
Dumque viri fortes muris tormenta pararent,  
250Ignavum vulgus studium fornacis agebat.  
O quantis studiis panes venduntur! et illud  
Unde monetati replent marsupia nummi!  
Post hec expoliis, que comportarat in unum  
Alpheus populus, movet anxia turba susurros,  
255Et repetit partes. Partiri capta recusant  
Hi quibus interius lacerat Maiorica mentes,

[p. 62]

Neve moram facerent, spoliis retinentibus illos  
Partibus, in tutas predam posuere carinas.  
Solvuntur classes; freta remis eruta spumant;  
260Vela tument zephyris; liquidas rapit aura procellas.  
Adveniunt Baleam Latii comitatus, et illi  
Qui propter Baleam celestia signa tulerunt.  
Est sinus haud modicus Balee de partibus austri  
Portus instar habens, ubi cornua bina videntur,  
265Per bis mille decem que sunt distantia passus;  
Replet utrumque latus Libico de litore raptus  
Pontus, et Arctoas finem distendit in horas,  
Quoque facit finem sinus hic de parte sinistra  
Urbs antiqua fuit raris habitata colonis.  
270Inde fere gentes ab Hiberis finibus acte  
Navigio celeri, duce precedente Moalfac,  
Christicolis pulsas plures posuere penates.  
Hic, ubi lata stetit celsis Maiorica muris,  
Insula distat ab hac brevis ut per milia quinque,  
275Que, complexa sinu, leve stat proxima terre.  
Portus in hac latus, Rodum vicinia dicit.  
Urbis ab hac possunt sublimia menia cerni,  
Ob quam Pisani tantos habuere labores.  
Illa dies letis populis octava refulsit  
280In qua felicem matrem super astra recepit  
Virgineus partus, de qua Deus est homo factus,  
Parva venientes qua congregat insula puppes.

[p. 63]

Luxque sequens fuit hec qua Christus morte resurgens,  
In mundo genitis vitam dedit atque salutem.  
285Hac de plebe viri, latices haurire volendo,  
Navibus egressi, per rus gradiuntur inermes.  
Ast equites regionis erant in valle latentes,  
Qui peditum plures incautos agredientes,  
Truncarunt gladio, quosdam cepere, suisque  
290Duriter astrictos secum duxere capistris.  
Hinc cum consulibus proceres tristantur et omnes.  
Tum Petrus antistes populos hortatus " Ad istos

" Tartareos aditus properavit vestra voluntas ",  
Dixit, et ostendit Balearica menia dextra.  
295" Captus ibi factor vester pius atque creator  
" Dicitur in membris; quis non pugnabit ut ipsum  
" Eruat? ipsa licet mortem sibi bella minentur?  
" Vos tamen in bello letum nolite timere,  
" Nonnisi pro bello vite quia poscitur auctor  
300" Atque dator, vite cunctis qui preparat usum,  
" Et qui pro nobis crucis est in stipite fixus.  
" Cum captis captus nunc permanet atque ligatus,  
" Ut det opem vincis, trahat et de nexibus ipsos.  
" Qui captum dominum pugnamve relinquit agentem  
305" Iuste dampnatur, digne privatur honore,  
" Et manet infamis semotus ab urbe foroque ".  
Hoc et Boso pater, presul quoque Caralitanus  
Comparibus verbis lacrimisque fluentibus addunt.  
His dictis, sedet in transtris festina iuventus,  
310Et placidas molitur aquas. In carbasa ventus  
Perflat, et amotis sulcatur navibus equor.  
Non volucres tanta penne levitate feruntur,  
Quanta rates levitas pacata per equora vectat.  
Miratur Balee populus candentia vela,  
315

[p. 64]

Et defixa tenens in classem torva tiramponus  
Lumina, dat lacrimas magno cogente dolore.  
Inde metum reprimens, quotquot rexisse putatur  
Permixti sexus educit ab urbe catervas,  
Ut late visus venientes terreat hostes.  
320Totque licet turmas sparsas per rura viderent  
Audaces, quorum commoverat insula mentes,  
Haud trepidare valent quos spes preclara fovebat.  
Pinea silva fuit qua lata patebat arena,  
A muris Balee ceu per sex milia distans,  
325Ex qua parte suo Titan petit ethera curru,  
Cui palus et pontus geminum latus arguit unda,  
Ortus et occasus nemoralia rura petenti  
Siccum dant aditum. Loca Ramora commemorantur,  
Sive Forenna, quidem plures dixere Catinos.  
330Hic ubi plana cite tenuerunt litora prore,  
Educunt properanter equos. Properantius arma  
Sumit, et ignote lustrat loca cernua terre  
Bellator populus, quem iustior ira movebat.  
Qui sibi commissas aliquas habuere cohortes,  
335Dispositas ipsas sectari signa iuebant.  
Post hec regis eques rarus progressus ab urbe,  
Iam castris positum vidit de collibus agmen.  
Quem Pisanorum rapidus comitatus equestris  
Ipsam dulcis aque fugat usque sequutus arenas,  
340Qui torrens Luidis solet in regione vocari.  
Nox redit. Excubias faciunt vigilantia castra  
Eximiamque satis fulgentia sydera noctem  
Reddunt. Signa polus demonstrat nocte sub illa.  
Stella cadens divisa comas per mille videtur.  
345Dispersum Balee signat divisio regnum.

" Ad Baleam", clamat populus. " Nos sidus ad illam

[p. 65]

" Crinitum properare monet; properate potentes;

" Est superare datum nobis Balearica regna.

" Sideris in Baleam radios cecidisse videtis ".

<sup>350</sup>Lux rediens fuerat qua sancti Bartholomei

Festa celebrabat lati devotio mundi,

Purpureis Titan radiis fulgebat, et aura

Nulla fuit, quasi lac placidi maris unda iacebat.

Immote ventis frondes. Volucresque quieti

<sup>355</sup>Cantus voce dabant. Resonabant intima silve.

Ammonet Alpheos ductor rectorque Pyrenes

Ordinibus factis aliquantum castra movere,

Quemque sequi sua signa monet. " Sit proutus in armis

" Qui cupit alterius ", dixit, " conquirere fines ".

<sup>360</sup>Paruit haud monitis istis avidissima belli

Gens, et torrentis modo dicti transiit hora

Classis, et ad campos vicinos menibus urbis

Plenius egressse fixerunt castra cohortes.

## 5. Libro V

Dumque ruunt acies avide certamine Martis,

Barbaricus campus Mauris dirisque Nigellis

Densus erat: clipeos alii tenuere rotundos,

Pars adoperta fuit captis Latialibus armis,

<sup>5</sup>Tunc cum Pisanas quondam piratica cepit

Turba rates, monstratque suos gens torva vigores.

Hic tunc procedens natus Bellominis Ugo

Maureusque simul giro rapiuntur equestri,

Primaque Maurorum cuneos ad bella laccessunt.

<sup>10</sup>

[p. 66]

Hinc bis octoni Pisana gente creati

Heroes, comitis sectantes signa Levanni,

Hostibus incurrunt mediis, densasque catervas

Sternere non cessant Libicorum more leonum.

Dant quibus introitum Baleares protinus ale,

<sup>15</sup>Et circumfuso velociter agmine claudunt,

Ac retinere putant quos spes satis improba fallit.

Ipsa pericla parant animos viresque ministrant

His quibus interne torquent precordia cure:

Sumunt quique suum perimuntque sagaciter hostem,

<sup>20</sup>Et quacumque ruunt campus patet amplior ipsis.

Et veluti Rodii sternunt perimuntque volucres,

Quando relucenti findentes aera penna

Agrediuntur aves laniantque patentibus arvis,

Sanguinea pariter miles Pisanus in asta

<sup>25</sup>Viribus infractis Balee terit acriter agmen,

Et redit illesus, cunctis mirantibus actum.

Post hec in geminas Balee milesque pedesque

Dividitur partes. Campos alii tenuere,

At iuxta fluctus quidam venere marinos,  
30Oppositumque petunt Pisanum durius agmen,  
Erectisque premunt rarissima cornua signis.  
Alphee cedunt, sed lentis passibus, ale,  
Et contra posito nunquam flectuntur ab hoste.  
Ex Arelatensi numero Vilielmus ad ista  
35Prelia Bernardus Mildace Daneta creatum  
Sternit, et in strati dimissa cuspage ventre  
Digreditur. Mauri socium de cede reportant.  
Tunc vexilla gerens Pisane signifer urbis  
Valandus cuneos in campum ducit apertum.  
40Hinc Ildebrandus sancte vexilla Marie  
Consul habens dextra sevos incurrit in hostes.

[p. 67]

Sedis apostolice vexillum detulit Atho,  
Et diras petiit violento milite turmas.  
Hos dum Pisani belli fervore sequuntur,  
45Inter condensos rapiuntur protinus hostes.  
Inde Pyrenee gentis generosa potestas,  
Clara sequebantur cuius vexilla cohortes,  
Pulverulenta petit galeato milite rura.  
Huius signa ducis Gerardi cura Levanni  
50Gestat, et ad levam procedunt agmina portam,  
Que patet ad claram surgentis lampada solis,  
Ac salse vicina magis cognoscitur unde.  
Hancque senex aciem sequitur comes Ampuriensis,  
Cui satis extiterat rector Balearis amicus,  
55Et subiit pugnam vallatus milite forti.  
Procedunt acies, et vi certatur utrimque.  
Eminus obstantes decertant Hismaelite.  
Hii iaciunt lapides, iaculis pars appetit hostem.  
Telorum tegitur tenebrosis nubibus aer.  
60Hinc dire veniunt in equos hominesque sagitte.  
Mars furit, et magnis resonat clamoribus ether.  
Tunc Latie turme, mortis terrore remoto,  
Incurrunt Mauris, et pugne cominus instant.  
Exeritur gladius, cessatque volatile ferrum:  
65Terra cruore madens morientum substat acervis.  
Toto mixta sonant gemitus hortamina campo.  
Ugo, Parlasii tectis nutritus et hortus,  
Aurea que gessit quatiens venabula dextra  
Pugnantis contra per pectora misit Alantis.  
70

[p. 68]

Ille cadit prophanter equo, fusoque cruore  
Tartareas flatum citius transmisit ad umbras.  
Occurrens Citharon casu commotus amici,  
Ugonis penetrat durata cuspage scutum.  
Ille, quod asta brevis contingere non valet hostem,  
75Ense vicem reddit, pugnoque relinquit adempto.  
Hunc Teperciades Dodo Bernardusque sequuti  
Ferratas feriunt minitanti cuspage portas.  
Utque redire parant, duo, qui redeuntibus obstant,  
Occumbunt pariter, Bachimas Hispanus et Ander.

80Guttur in unius Dodo postquam miserat astam,  
Cede cruentatum traxit cum cuspede pannum.  
Sed quod ferre potest Bernardi dextera telum  
In latus, Ander, habes. Manes ad Tartara raptos  
Accipiunt, Stigieque patent properantibus aule.  
85Viderat urbane pulsantes limina porte  
Rex Balee, reditumque viris prohibere nequisse  
Que tutabantur Balearica robora turmas.  
" Rebar et hos homines ", ait, " at iam credo leones ".  
**Dux Catalanensis sevum Moldonea poscens,**  
90" Primus ", ait, " nostris quoniam te viribus offers,  
" Integer haud poteris nostros evadere nisus ".  
Protinus urguet equum, teneras nec flectit habenas,

[p. 69]

Toracem clippeumque viri levamque papillam  
Telum transfodiens, per dextrum proterit armum.  
95Ille supinus equo ruit. Astaque frangitur ictu,  
Aurea sed comitis cuspis datur altera dextre,  
Que vibrata feros prosternat et Hismahelitas.  
Gerardus Porion prostravit cuspede vasta,  
Inque viri pectus vexillum misit et astam.  
100Daridis Umberti penetravit lancea costas.  
Ildibrandini Danius transfoditur asta.  
Rodolfo geniti Garsias sternitur ense  
Rollandi. Sevum ruit in Daneta Recuccus,  
Et, velut asta fuit, de dorso pellit equino.  
105Gerardusque comes rector dominusque Levanni,  
Dum furit in Mauros miles per bella probatus,  
Fraxinea Lelaphum fugientem percutit asta,  
Atque Niri scapulas ictu penetravit eodem.  
Stratus uterque ruit tanto deiectus in ictu.  
110Cui sonipes violentus erat violentius actus  
Pulveream campum cum corpore pressit herili,  
Seque regentis heri fregit labendo lacertum.  
Rainerius cum Tegrino, Raineria proles,  
In coacervatos ibat promptissimus hostes.  
115Sternit et hic Lephanton Tegrimus Alante creatum.  
Gerardus Gaitanus adest, qui cuspidis ictu

[p. 70]

Cerbereas Rachium transfixum misit ad horas.  
Viscardus Nilion letali vulnere sternit.  
Hinc Albertinus, claro Bellomine natus,  
120Per fauces medias ingentem fixit Aneten.  
Atrocem Laium venientem Vido Butensis  
Excipit, et victum Stigialibus agregat umbris.  
Saucius ipse dehinc graviter certamine cedit.  
Ildeprandinus, Iulitte filius, asta  
125Fundit Ilerdensem generosum stirpe Gairum.  
Ingentem Valandus agens, Valandica proles,  
Astam, quam validus vibrabat uterque lacertus,  
Inmanem Libicum duro resupinat in agro.  
Terga Rachis penetrat Valandi frater in ictu

130Cuspidis Albertus, misso per pectora ferro.  
Asta virum fortem stravit Molphena Dodonis  
Consulis, huius equum celeri penetrante sagitta.  
Gausmaro genitus, fama decoratus equestri,  
Ugo Dianensem telo penetravit acuto,  
135Mortiferumque fecit transfixo gutture vulnus.  
Sicherius, frater Valandi, perculit Idan.  
Hinc Mincharellus ruit, Ildebrandia proles,  
Et fudit Gurion, quem Corduba misit ad arma.  
Ugonis proles Albertus impulit Ermon.  
140Anticum Libicum Lanfredi dextra peremit.  
Stravit Ilerdenium Matilde filius Ugo.  
Inde Sapibonides campo deiecit Aristen.  
Atque Sofridutius transfodit cuspide Maulam.

[p. 71]

Popiliensis equum velocem Rusticus urgens  
145Per lumbare Taves astam transmisit acernam.  
Mittit in hunc iaculum magno conamine Nelops,  
Perque viri corpus letalis lancea transit.  
Acrior hic Maurum telo transfigit eodem,  
Tresque necans alios orrendum mandat ad Orcum.  
150Ast ubi membra viri sunt evacuata cruore,  
Felicem moriens transmittit ad ethera flatum.  
Occubuit Garathas Rubei Vidonis in asta,  
Indiguitque sui Cliton Suberamus amoris,  
Cui latus Abbatis transiecit lancea dextrum,  
155Cervicemque viri mucrone resolvit, et agri  
Pulvere proiectum pedibus submittit equorum.  
Extinti socius ferventi concitus ira,  
Te, Viviane, petit violentus ob arma Galindus,  
Et iugulare cupit pro morte libenter amici.  
160Non fugis audacem venientis militis ictum,  
Pretentaque virum properantem sternis in asta,  
Consorternque necis vite coniungis amico.  
Albicione sati clarus Lanfrancus ob arma  
Filius, obstantem Redum feriendo peremit.  
165Hinc Arabis fugientis agens cum cuspide lumbos,  
Compulit hunc leva selle de parte labare.  
Rarus eques densusque pedes de parte marina  
Barbaricos cuneos pugne stridore coartat,  
Pugnantemque terit summis conatibus hostem.  
170Alphei pedites, Domino prestante vigorem,  
Hic plures faciunt ensis seu cuspidis ictus.  
Ictibus attrite, cum iam tolerare nequirent

[p. 72]

Prelia, barbarice redeunt ad tecta phalanges,  
Et firmant duro ferratas obice valvas.  
175Menibus inclusis, discurrens undique, rector  
Anxius inperitat maneant ne cardine clauso,  
In campum redeant, et prelia dura reposcant,  
Ac repetant diros patriis pro legibus hostes,  
Et ne deficiant, nec vinci se patiantur,

180Proponens laudis quantum victoria prestat  
Et quantum tribuat victoribus utilitatis,  
Quantaque cum dampnis fedent obprobria victos,  
Quos fugit omne decus, quos deserit omnis honestas,  
Servicium, dolor hinc et tristia queque sequuntur.  
185Et lacrimans adiurat eos per delubra regni,  
Ne metuant populos quos lex Machamatis odit  
Sed sic decertent devincere quatenus ipsos,  
Et sub perpetuis valeant retinere catenis  
Qui se necne suum cupiunt disperdere regnum.  
190Hec agit, et cunctis animos viresque reducit.  
Ortantur proceres regem prohibentque timere,  
Atque mori spondent potius quam cedere bello.  
Signa capit Burabe, reseratur dextera porta,  
Prosiliunt turme, properant ad bella manipuli.  
195Dispositis signis Burabe iam stabat in agro,  
Durus agebat Alas dextre vexilla cohortis,  
In levo cornu torvo curante Corace.  
Plena dabant voces humano classica flatu,  
Nec tuba bella movens nec bucina defuit ulla.  
200Cum sic dispositos sancte videre cohortes,

[p. 73]

Directis igitur properant in prelia signis,  
Et dextram pariter satagunt invadere portam,  
Densus et innumerus fuerat qua barbarus hostis,  
Que quoque, Phebe, tuos claros spectabat ad ortus.  
205Iam Vilielmus adest, dominus montis Pesulani,  
Cui rota signa dabat, clara comitante caterva.  
Et velox tantis sese conflictibus offert  
Dux Nerbonensis, de nomine dictus avito  
Fulgentes acies, decoratas milite forti,  
210Precipit ante suos properanter sistere vultus.  
Nominat ille suos, largos quoque spondet honores.  
Quos videt audaces geminato robore firmat,  
Signiferumque monet nullo trepidare timore,  
Antequam fraternas prontum contendere turmas.  
215Iuxta Raimundus pugnam festinus adibat,  
Cui sedes Arelas, cui Balcia tellus origo.  
Hic Arelatenses promptos in prelia firmans,  
Ammonet ut nolint de posterioribus esse.  
Petrus ad hanc litem Grossus non signius ibat,  
220Hortaturque suos equites post cuspidis ictus  
Ne sint immemores inimicos ense ferire.  
Concurrunt partes. Miscentur utrimque manipuli.  
Saxa ruunt. Volitant densissima pila per auras.  
Martia signa canunt. Subeunt ad sidera voces.  
225Ira furor mixtos inter se concitat hostes.  
Telorum nimbis clipei galeeque teruntur.  
Arma sonant armis. Micat ictibus orridus ensis.  
Vulneribus misso saciatur sanguine tellus,  
Labentumque tegunt extincta cadavera campos.  
230Henrigum Milgilas poscunt Neriusque, sed eius



[p. 74]

Predurus clipeus iaculum propellit utrumque.  
Hos validos equites, Dertose finibus ortos,  
Cum Sigimundiade Vinithone creatus utroque  
Transfodiens, ambos de tergis sternit equinis.  
235Atque ferus Periton socius necis esset eorum,  
Subsidiatorem Balee quem Corduba misit,  
Cum centum sociis Hispana per equora vectum,  
Ni faciendo, fugam citius flexisset habenas.  
Tunc Erithone satus Danaen, Gerardus Arontam  
240Viribus insignes prostrarunt consul uterque.  
Dissecat obstantes cuneos tunc Balcius heros,  
Prosternens Arabem, perimitque deinde, Corellum.  
Bertraminus fratrem stravit Nilgdona Coracis.  
Ugo Delanda penetravit cuspide Tagum,  
245Et tulit ense caput. Post hec iuvenalibus actus  
Viribus Umberti cadit Alcimionides Unon.  
Sed Petri fratris deiecit dextra Nicalem.  
Urguet equum sacrista potens Raimundus, et aste  
Nelioben valido percussum transfodit ictu,  
250Cornipedemque rapit, precii non vilis habendum,  
Armigeroque suo gemmatas tradit habenas.  
Tunc Ildebrandus consul dirum Niceronta  
Transfodiens ferro per pectus dirigit astam,  
Vexillumque trahit madefactum sanguine Mauri.  
255Petrum Parlasii bello quem miserat hora  
Agreditur Balager. Grandi retro pellitur ictu,  
Militis Alphei sricula percussus ab asta.  
Ad socios igitur fugiendo retorquet habenas.

[p. 75]

Transfigit asta Rodon, Pusii vibrata lacertis.  
260Flocius ense cadit, quem Gelli filius Oddo  
Viribus assumptis ictu transverberat uno.  
Insignes equites Pesulani montis ad istos  
Adveniunt ictus, Vilielmi signa sequentes.  
Dalmatius Castrensis ibi Molphenida leto  
265Subpositum fecit per acute cuspidis ictum.  
Et Murivetuli miles Sichardus Emonem,  
Petrus Amunta petens, Bernardus Amunte creatum  
Proiciunt perimuntque simul, Froctardia proles.  
De villa Bosci Machamata vasta Videlmi  
270Lancea transiecit. Tum Berengarius Oran  
Verune miles perimit, sociatque geenne.  
Tu, Raymunde Midan, cui prebet Eradius ortum,  
Dertosane cadis forcas penetrante Vilelmi  
Cuspide, cui sedes fuerat Pinianica tellus.  
275Dux Aimelrigus, speciosis clarus in armis,  
Occupat obstantes fervente vigore catervas.  
Cui ferus Alcimio, fatis properando sinistris,  
Occurrit, cupiens ulcisci funera nati.  
Prevenit hunc Atacis ductor, nec deviat ictus,  
280Per pectus volat asta tenax umbone forato.

Occidit, et moriens premordet dentibus erbam.  
Promta phalanx comitat ducem, satis ardet in hostem.  
Fraxinus Henrici te pectoris, Atila, fixit  
In medio; ferrum vitalia cuncta retraxit.  
285Et Pusii frater Lambertus Agranta peremit.  
Mindon ab Esculea dictus Rainutius hora,

[p. 76]

Horrendum nimium fixit Ricapectora Carben.  
Inque Valentinum Plegonem Barutius astam  
Per scapulas misit levam figendo papillam,  
290Traiectumque virum medio prostravit in agro.  
Pharion Hispanus Vinicelli sternitur ictu.  
Dum cadit Abrotani ruit inter lora fugacis,  
Cuius Saltarus transiecerat illa virga.  
Quando duos pariter fixit iaculando Nigellos  
295Gerardi proles Opizo, cum pube suorum  
Invadens aciem, satagit prosternere Mauros.  
Gausfredus Parthum, Rainerus proterit Afrum,  
Consortesque necis fecit germanus uterque.  
Marinianides Bernardus Ilogea leto  
300Donat, transfigiens cedenti cuspide costas.  
Cuspide Silleti dirus prosternitur Olphes.  
Grunnius Alcheon sternit, Mauretus Edonem.

**Undique discurrens rector Catalanicus hostes**

Dissipat, et socios ortatu divite firmat.  
305Ampurie fortes equites et Rusilienses,  
Subsidiando duci, dant plurima funera Mauris.  
At Petri Grossi deiecerat asta Coracem,  
Cuius promptus eques multos patraverat actus.  
Sed iugulare virum cum iam mucrone pararet,  
310Currentes Mauri socium de cede tulerunt.  
Signifer Alpheus medios violentus in hostes  
Currit, et exacuens fortes in bella sodales.  
Ut reliquas prosternit aves regina volucrum,  
Sic sic hostiles terit insistendo phalanges.  
315Barbarici statim cunei turbantur, et inde  
Conversi fugiunt. Pisani terga sequentes,  
Urbanas inter propellunt agmina portas.  
Innumeri capiuntur equi, capiuntur et arma,

[p. 77]

Et fusi per rura lacus iacuere cruoris.  
320Alcius ascendens Phebus contraxerat umbras.  
Ad sua victrices redeunt tentoria turme.  
Bellica per campos Balee iam facta patebant,  
Extinctosque viros fusos spectare per erbam  
Barbaricus populus simul et Pisana valebant  
325Agmina. Legati veniebant atque redibant.  
Accipitres, vestes, privataque dona dabantur  
His quibus Ampurie comes hec tribuenda monebat.  
Vendita fit pietas. Tunc multum devius heros  
Regi transmittit cartas, recipitque latenter  
330Huius scripturas que rescribuntur ad ipsum.

Pestifer interea dum federa quereret hostis,  
Quos divinus amor, non preda nec ulla simultas,  
Sed Christi pietas ad iusta vocaverat arma,  
Captivos omnes sine conditione volebant.

335 Nazaredeolus certa sine lege paratus  
Reddere non fuerat, nexuque fameque coactos  
Carceribus distentos attenuando necabat,  
Ac Pharaoneos retinens in mente furores  
Que spondebat heri cras inficiendo vetabat.  
340 Utque dolosa vident patres colludia regis,  
Solantur populum, populus solamine gaudet.  
Dum trutinare novos nituntur pectore sensus,  
Itque reditque dies. Nam preterit unus et alter,  
Castraque paulatim mutata propinquius extant  
345 Menibus, ac creber procedit ab urbe tumultus,  
Optime Dalmati, quem tu non lentus adibas.  
Nam crebro facte pugne non tardus adesse  
Cerneris, in tantum pugne tibi suppetit ardor.  
Ergo die quadam paucis comitantibus hostes  
350 Corde volente petens, sociis absistere iussis,

[p. 78]

Cum geminis solus vadis contendere Mauris.  
Viribus ergo tuis prostratus corrui unus,  
Alterius mox dextra tibi penetrabile scutum  
Transfigit, mediam penetrat quoque lancea coxam.  
355 Hinc patet, est miles non loricated inermis.  
Stratus equo pugnare paras, sed vulnere factus  
Debilis, innumeros equites sine lege ruentes  
Decidis excipiens. Feriens te barbarus ensis  
Decapitat, felix transmigrat ad ethera flatus.  
360 Talia belli potens ut concipit aure Vilelmus  
Dat lacrimas, tristesque viri de funere questus  
Profundit. Nec ad ista vacat, sed clamat ad arma,  
Ulciscique necem iugulati currit amici.  
Heroem centum sectantur ob arma micantes,  
365 Qui promptos gestare solent ad bella vigores.  
Accelerat, campumque petit: sua menia Mauri  
Ista meditantis properatis gressibus intrant.  
Militis acquirit, vindex modo cum nequit esse,  
Gotica turba capud, mutato denique Mauro.  
370 Ante diem Domini semper que proxima fulget  
Lux rediit, qua tempus est sine turbine clarum.  
Iamque sui cursus nonam perfecerat horam  
Phebus, cum fortes redeunt ad prelia Mauri,  
Christicolasque putant ad castra requirere tantum.  
375 In numero fidunt equitum peditumque potenti.  
At cauti pedites currunt letanter ad arma  
Pisanu, visosque petunt non segniter hostes.  
Spicula tela simul lapidesque venire per agros,  
Et pluvie ritu poterat spectare sagittas.  
380 Pugne sevit amor, Pisanis robur habundat.  
Dumque ferunt ictus, dum totis nisibus instant,  
Hismahelitarum cuneos in menia mittunt,

[p. 79]

Et certant summum robur prosternere valli.  
Calcatos equites subeuntes limina porte  
385 Transfodiunt et equos .... durantibus astis.  
Summaque murorum sternunt violenter, et ipsas  
Concuciant portas, funduntque viriliter hostes.  
Denique conspiciunt gemine fundamina fosse  
Mirantes muros et defensacula circum.  
390 Discrepat a visu quicquid pervenit ad aures  
Urbs, multorum subit in precordia terror.  
Diffidunt igitur multi, tremulumque revolvunt  
Ore silente caput, tanto pro robore fortes  
Ipsi desperant urbem superare potentem.  
395 Tres fuerant urbes, unum que nomen habebant.  
Sed diversa tamen si nomina queris earum,  
Nominibus diverso poteris quamcumque notare.  
Arabathalgidith prime nomen vocitatur.  
Nazaredeolus fuit huius conditor urbis,  
400 Per quinquaginta que fit circumdata turres  
Usque Bebelgidith: sic est vocitata secunda.  
Arabathalgidith murus fabricatus ab ipsa  
Incipiens, urbis corpus circumdat, et, undas  
Equoris attingens, mare iuxta volvitur illuc  
405 Quo densat celsas urbs Elmodenia turres.  
Dividit has murus, circumdatur una duabus,  
Quas circum decies cubitorum milia cingunt,  
Hoc numero demptis ter ternis atque duobus.  
In numero certo turres sunt scire volenti  
410

[p. 80]

Quattuor et decies septem centumque notande.  
He tres una queunt urbs famosissima dici.  
Est commune tribus positum Maiorica nomen,  
Inter quas etiam torrens placidissimus ivit,  
Et per quinque queunt torrentis viscera pontes  
415 Transiri, liquide cum plus fluit impetus unde.  
Exequinque vocant. Qui plenius affluit amnem.  
Dicitur Enelamir producta canalibus unda,  
Que potanda viris dulces dabat omnibus haustus.

## 6. Libro VI

Indigenis populis et ob auctas fortiter artes  
Mentis tuta forent, si nutus Omnipotentis  
Iustitiaeque caput dicto cum rege manerent.  
In populi numero non debet fidere quicquam,  
5 Qui Dominum contra sublimes erigit arces.  
Namque Mohabitas rector Balearis ad arma,  
Getulos, Arabes, Parthos, Libicosque, Medosque  
Nec non Hispanos, multo conduxerat auro.  
Es dedit inmensum, non intemptata relinquens  
10 Per que tuta dari patrie solatia possent.

Ergo pugnatum, tractare viriliter arma

[p. 81]

Qui poterant, sibi sexaginta milia vel plus,  
Ast equites perhibentur ei ter mille fuisse,  
Et centena dabat pregrandes machina moles.  
15Mille quater ductus numerus fuit arcitenentum,  
Figere qui poterant missis loca certa sagictis.  
Fundibulorum pre multitudine certus  
Non fuerat numerus, sic nec lapides iacientum.  
Noscut tanta patres cito robora non superari.  
20Hortantur socios, et contra robora robur  
Accelerare parant. Naves prius esse trahendas  
Constituunt. Et perficiunt hec iussa libenter  
Agmina cuncta. Solum tracte tenuere carine.  
Inde duces Latii viciniis addere castra  
25Festinando iubent. Iussis paretur eorum.  
Antistes Petrus tectum de parte marina  
Cum cleris habuit. Fuerat vice domnus in illis  
Cui Gratianus erat, dedit hoc sibi gratia, nomen.  
Non humilis, non alta nimis domus affuit, unde  
30Prelia cum socio crebro suadebat Obertus.  
Iuxta pontificis tectum tentoria patrum,  
Ut citius veniant ad eum cum sepe vocentur.  
Nobilitatis honor non longe densus habebat  
Hospicium. Fortes steterant a fronte caterve  
35Pisani populi, qui vitam duxit in armis  
Totam, perpetuos solitus tolerare labores.  
Huic non algor erat, non formidabilis estus,  
Hunc non grando ferox, non nix hymberve movebant  
Hostes et muros violentius agredientem.  
40Hec erat ingeniis spectanda iuventus et armis.

[p. 82]

Ingluuiem ventris nimiamque perosa quietem,  
Noverat et brevibus submittere lumina somnis.  
Ast equitum robusta manus non sparsa per agmen,  
Sed iuxta levam fixit tentoria portam.  
45Talis ab equorea facie porrectus utramque  
Observat portam populus. **Catalanicus heros**  
Illius in medio quo sit tutissimus extat,  
Namque vigor Latius dextra levaque sedebat,  
Hospiciumque ducis retro vallabat et ante.  
50Stat post Pisanos Cardune rector, et illinc  
Plurima post illum que misit Gotia tellus  
Agmina, que predas potius quam bella gerebant.  
Ante duces reliquos sua fecit castra Videlmus  
Et dextre vicina magis quam cetera porte.  
55Iuxta quem pariter sua cepit Baltius heros,  
Et Nerbonensis domini post ista steterunt  
Fulgentes acies, quas iuxta Rusilienses.  
Ampurie rector post omnes castra tenebat  
Et vallatus erat sola de gente suorum.  
60Hi silvas et rura petunt, armentaque multa

Direptosque greges, et quicquid germinat arvom  
Ad socias acies converso tramite ducunt.  
Lignea tecta trahunt, paleas ubi comperiuntur,  
Arboreasque simul vulsas cum stipite frondes.  
65Gotorum pedites vel quos Provincia misit,  
Mercibus allatis, discurrunt agmine toto,  
Et venale facit quicquid dabat insula vulgus.  
Pisani summis arcent conatibus hostes.

[p. 83]

Hique, colendorum patrum precepta sequuti,  
70Edifficant geminas superantes omnia turres  
Menia de lignis, vulgo castella vocantur.  
Altum surgit opus. Sublimia culmina quarum  
Aereas subeunt summis cum nubibus auras,  
Offenduntque satis ducentes frigora ventos,  
75Astutusque magis nil fecit Degdalus arte.  
Vimineae crates ducte de rure propinquo,  
Multaque terga boum lateralibus queque tegebant.  
Suppositis igitur postquam residere paratis,  
Impulse graviter celeri molimine currunt.  
80Ut nubes quas forte Nothus violentior auctas  
Imbribus ad celum pluvioso turbine vexit,  
Quarum rura pedes celos agitare cacumen  
Sepius aspicitis, que currere quippe videntur,  
Pisanis acte turres non signius ibant.  
85Astantes igitur multi mirantur euntes  
Qui similes numquam potuerunt visibus arces  
Subdere. Mox gemina subeunt testudine muros.  
Et dum Martis erat creber variusque tumultus,  
Tuta Mohabite violenti menia sepe  
90Egrediebantur. Trahit impetus egredientes,  
Casus et hos potius quam bellicus instruit ordo.  
Utque Robertus eos audaci strenuitate  
Motus vidit, ait: " Pro se certantibus auctor  
" Est Deus, et robur pro se pugnantibus auget ".  
95Dixerat, et plures solus properavit in hostes,  
Et partitus eos simul et fugientibus instans,  
Inter murales aditus pugnando reclusit.  
Corruit huius equus fovea; pro casus iniquus!

[p. 84]

Protinus e sella se compulit ire regentem.  
100Hic clippeo iaculoque prius, mucrone deinceps  
Pugnat, et Hectoreo decertans robore consul  
Sustinet innumeros ruinosos iactibus ictus  
In se collatos. Nudo quoque fortiter ense  
Dimicat, et solus multorum robora sentit.  
105Dumque pluunt lapides et tela cadunt super illum,  
En levam supra cita figitur asta papillam.  
Eu! clippeus non obstiterat, lorica ruentem  
Incarnare virum facile dimiserat astam.  
Accelerant, raptumque ferunt de marte propinqui.  
110Iam castella super defossi robora valli

Implebant latas gemina testudine fossas.  
Erigit antennam Balearis in arbore cura,  
Castellis etiam que cernitur esse duobus  
Altior, in summo cuius bellator habebat  
115Excelsum tutumque locum. Velamina panni  
Plurima sublimem septenaque terga tegebant,  
Qualiter excelsae spatiosa per equora naves  
Sepius ire solent piratica bella timentes.  
Loricam tutam habet, clipeumque rotundum  
120Et protectus erat cristata casside vertex.  
Per triplices funes antennae callidus usus  
Vesantum Maurum vacuas porrexit in auras.  
In quasi subiectas turres proicere cautes,  
Et lapidare viros, et mittere tela valebat.  
125Ardet in antennam pugnantum fortiter astus,  
Atque duos funes cum falce recidit acuta.  
Tertius antennam retinebat in aere funis.  
Pertimuit Maurus ne, falx si cederet illum,

[p. 85]

Invitus rueret, vel protraheretur ab unco.  
130Ergo, velut moles de summis eruta saxis,  
Per funem labens, dedit intra menia saltum.  
Grandia labentis senserunt pondera palme.  
Christicole gaudent, alacres dant agmina plausus  
Ammirata virum per inanes currere ventos.  
135Nutabant turres Baleae, murique cadebant  
Quos fodiebat ovans toto molimine fossor,  
Cui per quemque diem fulvum numisma dabatur.  
Hos aries duplex de testudinibus actus  
Et de castellis ictu graviore petebant,  
140E quibus artifices mittunt super ardua pontes  
Menia, cumque volunt turres invadere possunt.  
Per quadragenos passus et apertus et amplus  
Introitus fuerat. Cetum fecere cohortes.  
Cardinibus Boso de primis taliter unus  
145Inquit et hec monuit; monitus et verba notantur:  
" Qui fines patrios, qui deseruere parentes,  
" Uxores, natos, et quicquid dulce videtur  
" Sensibus humanis, vos pro pietate fuistis.  
" Si pietatis amor vos cum mercede vocavit,  
150" Cur pietatis honor non contra viscera fortes  
" Impietatis habet? Baleae spectate leonem,  
" Qui male tractat oves et Christi dissipat agnos.  
" Spectat ab excelsis muris molimina nostra.  
" Incassum factas turres quoque credit et arces,  
155" Et nos et pariter subsannat Cunctipotentem,  
" Agminis auctorem qui sese pretulit huius  
" Ut vos informet. Vos Egyptum spoliare.  
" En Pharaoneis fratres servire cathenis  
" Cernitis. Ultrices frangant hec in pia dextre  
160" Tartara. De penis fratresque trahantur eorum,

[p. 86]

" Sitque beatus homo qui pro conflictibus istis  
" Occumbet. Penas nequeat sentire gehenne.  
" Non aliquis demon de crimine sive reatu  
" Audeat ante Deum sibi conflictum generare.  
165" Gaudia dentur ei que fini subdita non sunt,  
" Que servare solet vel que prebere beatis  
" Splendor sanctorum, pia lux et gloria Ihesus.  
" Non dubitent hi quos fuerit Regina polorum  
" Cum nato comitata suo pugnare: Deus nam,  
170" Quia pia causa fuit pro qua vos arma tulistis,  
" Adiutor fiet vobis, terrebit et hostes  
" Et conculcabit divina potentia vestros.  
" Hec ad certamen vos spes invitet euntes.  
" Signifer et Michael vobis precedet, agetque  
175" Cum sociis hec bella suis Baptista Ioannes  
" Et patriarcharum chorus arduus atque prophete.  
" Ne trepidate: duces vobis in prelia fient  
" Ecclesie Petrus cum Paulo tuta columna,  
" Nec non Matheus, Lucas, Marcusque, Iohannes  
180" Et reliqui vestre facient solatia pugne.  
" Auxiliumque dabit vobis certe protomartir  
" Cum sociis Stephanus, Sylvester cum Nicholao.  
" Virgineusque chorus vobis succurret, opemque  
" Agmina sancta dabunt. Hanc spem retinete fidelem ".  
185Dixerat: at lacrimae fluxere per ora loquentis  
Ex oculis: deflent quia cernunt agmina flentem,  
Que votis pariter promittunt prelia totis.  
Denique castra petunt cum iam subit equora Titan.  
Nox habit. Aurore Phebus de parte resurgit.  
190Bellica signa sonant. Toto properantque vigore  
Urbis ad introitum Pisanum robur et omnes

[p. 87]

Gotorum populi vel quos Provincia misit.  
Intus Agareni perstant, valloque supersunt.  
Densa ruinosas iacit undique machina moles.  
195Pisane bellant acies, adituque resistunt,  
Urbanas inter summis cum viribus edes  
Hostiles pellunt pugnantes fortiter alas.  
Post pedites equites veniunt, sed durius intrans.  
Difficilis ingressus equis, reditus nimis asper  
200Cum remeare volunt. Miles Balearis ubique  
Cogit ad arma suos, vires adhibet reficitque.  
Alphei, litem telis gladiisque gerentes,  
Obstantes cohibent collatis nisibus hostes.  
Telorum super hos nimbi lapidesque ruentes  
205Adveniunt: vallique terunt in margine ductos.  
Vertere terga parant, retro flectuntur habene  
Quos Balee faciunt nimium properare vigores.  
Sed Pisana cohors, per plurima vulnera lapsa,  
In sua castra redit, muri munimina linquens.  
210Turres quam citius Baleares inde phalanges



Letanter plaudendo petunt, et tympana letis  
Ictibus incipiunt ob gaudia summa ferire,  
In quibus et Furie poterant Bachusque notari.  
Tollunt astra diem, non preterit ira dolorque.  
215 Ut redit altera lux, certatim menia poscunt  
Pisani cunei, quibus hec sunt iurgia cure.  
Amplaque dupliciter via fit, temptatur, et intus  
Cunctorum parat ire vigor. Cum Phebus agebat  
In sublime suam progressus ab aequore lucem,  
220 Per factos aditus patulam pedes intrat in urbem,  
Inque resistentem turbam non leniter actus  
Barbaricis cuneis terrorem mortis agebat.  
Ast equiti nimis artus erat pro margine trames.  
Invitant pedites equites intrare, reductis

225

[p. 88]

Qui convertuntur contra tentoria frenis,  
Quos vulnus trepidare facit seu funus equorum.  
Tunc equitum cemens extrinseca turba pavorem  
A fractis muris collapsa robore cessat.  
Ista Mohabite cernunt, animisque resumptis,  
230 Per cunctas veniunt equites peditesque plateas.  
Dat tergum Pisana manus, que menia dudum  
Invasisse datur, clipeisque extimplo relictis  
Diffugiunt plures. Remanet Rainerus ibidem,  
Qui Malecomentum cognomento vocitatur.  
235 Quem socii postquam fugientes deseruere,  
Inter Agarenos nudo mucrone cucurrit.  
Ah quotiens fecere locum fugisse valeret,  
Si fuga tuta foret! gladio stetit ille minaci,  
Et quemcumque super violentia concidit huius,  
240 Cerbereos rictus et Tartara nigra petivit,  
Vel sine letali dum vixerit ille dolore  
Non erit. Hinc solum iussu petiere Coracis  
Et circumseptum iaculis fixere cohortes.  
Occubuit postquam sibi vulnera mille fuerunt,  
245 Exanimique viro, post vulnera tanta iacenti,  
Ablatum caput est: petiit pia sidera flatus.  
Ira patres populumque tenet, sociosque peremtos  
Egrotosque simul multa pietate queruntur.  
Agmina nam, postquam latices, non vina, bibebant,  
250 Concliderant morbis. Mutatio nempe ciborum  
Laxatos ventres in multa pericula traxit,  
Unde manus non parva malis oppressa cadebat.  
Innumeris igitur multi cecidere potentum,  
Qui titulis claris caput in sublime gerebant,

255

[p. 89]

Et plures quibus equa stetit cum funere fama.  
Iamque viam tumuli pariter cum rure tegebant,  
Nobiliumque simul positas in litore capsas  
In reliquisque locis aliquis spectare valebat.  
Inter tot lacrimas natorum sive parentum,  
260 Tot licet ac tantos ferat inclita turba dolores,  
Non tamen a pugna cessat reliquoque labore.

Decernunt pugnare patres, iterumque resumptis  
Viribus audaces animant in bella catervas.  
Dumque diem Domini celebrarent secula cuncta,  
265Bertraminus Mauros petiit per prelia clarus,  
Cuius opes Arelate nitent, et origo parentum  
Nobilibus titulis viget illic clara suorum.  
Hic accinctus erat gladio, fundeque magister  
Hostiles acies lapides iaciendo petivit,  
270Atque quod egregios fecisset sepius actus,  
Utpote qui sese cunctis conflictibus ultro  
Obtulerat, cuneos nichilum modicumve timebat  
Adversos. Hostis qui muris stabat in altis,  
Sepe, velut volucer quem grandinis appetit ictus  
275Post frondem foliumve caput velociter abdens,  
Proiectos lapides vitabat tegmine quoquo.  
Hinc Balearis in hunc tectus; septemplice tergo  
Intrepidum iuvenem quidam properantius ibat.  
Hic igitur clippeum peditis post se venientis  
280Accipiens, hostemque sequens, in menia sevos  
Provocat ad bellum Mauros de margine valli.  
Tunc Parthus, cui promta satis mens, promptior arcus  
Atque sagitta fuit, postquam contenderat arcum  
Transfodit fauces: penetravit missile guttur,  
285

[p. 90]

Audacem mors atra virum de nobilitate  
Tollit, quem socii deflent, celique coronant.  
Rore pruinoso, Phebo prestante calores,  
Et matutino iam frigore rura carebant,  
Cum turme, dapibus sumptis Bachique liquore,  
290In Balee muros promptis non segniter ibant  
Gressibus, atque tube plus quam vicina replerant  
Cantibus, inque suis acies equitum peditumque  
Ordinibus steterant, astis vexilla micabant.  
Signiferi ducunt acies, et clamor euntes  
295Concitat, et patulos invadunt agmina muros.  
Concurrunt hostes contra molimine toto,  
Alpheosque petunt et quam robustius instant.  
Saxa ruunt, et tela pluunt, et spicula ritu  
Grandinis instantes populos utrimque petitos  
300Cuncutiunt prorsus, sternuntque teruntque premuntque.  
Vimineas crates moles lacerare videntur.  
Vulneribusque ruunt alii, moriuntur utrimque  
Multi, conspicitur sanguis profusus ubique.  
Iam remeare parant fesse per bella caterve,  
305Difficilemque nimis nequeunt plus ferre laborem.  
Signifer Alpheus prompto per bella vigore  
Discurrit, reficitque suas hortando cohortes.  
Adveniens super hunc magno cum turbine saxum  
Vexillum lanians, astam levumque lacertum  
310Comminuit. De mortis eum rapuere periclis  
Quam celeres socii. Cure subiere medentum,

[p. 91]

Nempe Boni proles Petrus, Gerardus et Ugo

Ipsam peoniis curarunt protinus erbis.  
Casibus hic variis discrimina Martis aguntur,  
315 Occumbunt plures, redeunt sine vulnere nulli.  
Qualis ab Ideis populus remeabat Achivus  
Menibus, et quales fuerant per prelia Troes  
Dum bonus incolumes Hector Priamusque manebant,  
Protinus a pugna redeunt; sed barbara turba  
320 Funeribus variis plures habuisse querelas  
Creditur, et multo plures habuisse dolores.  
Cura patres Latios non parva dolorque premebant,  
Quod bene pugnatum sibi nullos attulit usus.  
Nam perfecta suis nec erat victoria dextris,  
325 Hostis bella magis quam curam pacis agebat,  
**Et comes Ampurie nec non Catalanicus heros**  
Ad patrios remeare lares properando petebant.  
Causa recedendi quenam vel qualiter esset,  
Nuntia carta fuit Baleam transmissa Diana.  
330 Illa Mohabitam molitum prelia regem,  
Et vastata satis narraverat optima terre,

[p. 92]

A Barchinone muris nichil esse relictum  
Usque Terragonam quod lautum visibus esset,  
Omnibus inque locis Mauros referebat et ignem  
335 Rura, domos, segetes, fructus pariter populatos.  
Post multum dampni quod gens vesana peregit,  
Et Tramaricem captam dixere liture.  
Fidus erat comiti qui cartam duxerat istam,  
Et tamen hec fuerant aliter quam fama tulisset.  
340 Nam Barchinonam prefatus venerat hostis,  
Castraque Iudeo sua fecerat ardua colle.  
Urgelli comitem, comitem quoque Sardanique  
Dicunt, et reliquos regionis ab usque Girunda  
Electos equites, quibus assunt prelia ludus,  
345 Agmine collecto crudeles Hismahelitas  
Mirando pepulisse modo, Domino faciente,  
Innumeras acies pauci pugnando fugarunt,  
Eque fugam versis multi cecidere, venirent  
Ad supradicti donec deserta Salodi.  
350 Captos constat equos plures, predamque potentem  
Barchinonensis populus perduxit in urbem.  
Nec Tramaricem captam ceu dixerat ille.  
Damna quidem fuerant, sed commoda plura fuerunt.  
Hanc comitis causam, qua posceret ille recessus,  
355 Diximus; ad reliquos nos ordo convocat actus.  
At comitem patres miti monuere relatu  
Ut desistat ab his, communia pacta per ipsum  
Intemerata rogant et iuramenta manere.  
Ille, licet causam quam patres dicere veram  
360 Noverat, a lucris se non subtraxit avaris.

[p. 93]

Pacta reformantur, Barchinonensia damna  
Ut reparata forent. Dictis statuere supremis

Condere tecta patres gravidis hyemalibus apta  
Temporibus, retroque iubent castella trahenda.  
365 Incrementa parant belli. Nova postulat hostis  
Federa. Federibus non audent credere multum  
Qui violenter amant aliquam sibi subdere gentem.  
Incustoditis etiam custodia non est  
Commitenda viris. Iuvenum laudabilis etas  
370 Sed non omnis adest. Laudandus ob omnia sensus  
Florentum iuvenum, quos vinum, fercula, somnus  
Fallere sepe solent, nec possunt affore queque  
Tuta iuventuti nimium que diligit ista.  
Ergo, soporifero saciati corpora vino  
375 Pisani iuvenes, testudine nocte quiescunt  
Hii quibus hostis erat Somnus, depulsus ab ipsis  
Noctibus innumeris. Baleares edocet ergo  
Ut Pisana petant nocturno tempore castra,  
Et: " Properate, precor, sunt in testudine ", dixit.  
380 " Quos retinere queo, teneo vincoque quiete ".  
Talia dicentem Balearis turba sequuta  
Nocte silente fuit, cuius custodia prima  
Transierat. Veniunt milleni castra petentes  
Armati, piceasque ferunt cum sulfure flammam  
385 Permixtas. Aliquis piceum persentit odorem.  
Ammonet ut vigilant. Sed iam vigilare nequibant,  
Quos Somnus lenis titubanti texerat ala.  
Auscultant quid agant hi de testudine: stertunt.

[p. 94]

Inmittuntque focum: nichil est nisi somnus in illis.  
390 Per tabulas flammis diffusis tecta cremantur.  
Persentit strepitus somno decepta iuventus.  
A crepitante cito solvuntur somnia flamma,  
Protinus arma viri capiunt, clamare potenter  
Incipiunt. Una clamorem fecit et hostis.  
395 Vocibus et summis totum circumtonat agmen,  
Undique concepti moverunt castra tumultus.  
In Balee muros populus circumfluus ibat.  
Postquam cuncta rogos consumpsit, robora flamme  
Perdiderant. Mauri vocitant sua numina, sanctos  
400 Reginamque poli blasphemant crebro Mariam.  
Ut tenebris lapsis produxit ab equore Phebus  
Luciferos radios, populi fervente querela,  
Colloquii patres promptissima signa dederunt.  
Omnibus ad cetum venit de partibus agmen.  
405 Incipit Atho queri, sed concio tota querentem  
Attendit, brevibus narrantem singula dictis,  
Ignavos quosdam seu despectos vocitantem  
Et defraudantes sacramentum pietatis.  
Hec reliqui patres una populus comitesque,  
410 Hec viribus crebris, non bisve semel petebant.  
Continuo castella trahunt retro bina, simulque  
Altera bina parant velociter edificare,  
Et mox ligna rates scripserunt cuncta daturas.  
Nec mora: ligna boves et mulus equusque tulerunt.

415Mulus, equus vel homo de regis attulit ortis  
Innumerum vimen, vites, malosque nucesque  
Et, glauce salices, si que poteratis in ullo  
Rure recognosci, vos horum vincla fuistis.

## 7. Libro VII

[p. 95]

Quattuor aereas castella videre per auras  
Surgere Pisana dudum poteramus ab arce.  
Massilie quondam Rome violenta potestas,  
Cui mare, cui tellus et plurima regna patebant,  
5Ut superaret eam sane non celsius ullum  
Edificavit opus. Rector Balearis ab ipsis  
Nocte dieque suos nescit convertere visus  
Turribus, et similes operi fecere Latino  
Artifices totidem subita velociter arte.  
10Ac, duplex aries quos crebro straverat ictu,  
Edificare parant celeri molimine muros.  
Inde Dianensem signatam mittit ad urbem  
Rex Balee cartam. Pontum brevis incipit alnus  
Scindere. Terra brevi spatium litusque petita  
15Subsidium, socii simul alta Diana fuerunt.  
Ceperat et populus tales audire lituras.  
" Nazaredeolus, Balearis rector et auctor  
" Regni, mille suo felicia dona Buthali  
" Atque Dianensi populo non parva salutis  
20" Gaudia. Velle meo vos quondam promeruissem  
" Ut quam tuta modo solatia vestra rogarem.  
" Sed tamen illa modo vobis solatia posco,  
" Que nullo regi cognosco iure neganda,  
" Adversatur enim cunctis communiter hostis  
25" Qui Machamaticum celebrandum numen adorant.

[p. 96]

" Nos leges moresque vetant retinere paternos,  
" Observare monent stat contra dogmata quicquid,  
" Et vitanda docent nostri precepta Rasulle.  
" Captivosque petunt, quos latus pontus ab usque  
30" Oceano servire mee Balee vobisque paravit.  
" Cuncta petunt etiam rerum discrimine nullo.  
" Captivis habitis etenim sine conditione  
" Poscunt ut, regni nulla michi parte relictas,  
" Vita contentus regiones solus et urbes  
35" Quas placet ingrediari, vernis sociisque relictis.  
" Vos modo per nostras dantem Machamata leges,  
" Perque meum vos oro bonum dandumque datumque,  
" Christicolis Balee populandum cedite numquam  
" Conspicuum regimen, quod vestro pollet honori,  
40" Nam vestras replent eius bona plurima terras.  
" At si non vultis nostras audire querelas,  
" Nec vestre mentes sola pietate moventur,

" En trado vobis, Balee defendite regnum,  
" Ne subeant hostes vestre precordia terre,  
45" Si Pisana manus violenter ceperit illud.  
" Straverunt Ebusum. Balee spectate quid instet  
" Per menses binos iam cuncta pericula passe.  
" Belligeros stravere viros. Ad prelia fortes  
" Qui superare queant rari michi nempe supersunt.  
50" Vires atque viros cupio per bella potentes.  
" En renovo muros quos stravit plurimus hostis,  
" Pugnacis Balee turre reparantur et arces.  
" Confractas reparat turre sevissimus hostis,  
" Nisibus et summis alias adiungere certat.  
55" Ad Moroch regem, cuius vos nempe sub ala

[p. 97]

" Tutos non dubito pacis gaudere quiete,  
" Quas invitus ago pro me deferte querelas.  
" Suscipiat Balee non tempnendos famulatus  
" Atque tributa precor. Per eum retinere coronam  
60" Et regimen cupio. Nostrum Machamata testem  
" Et data iura voco que nos retinemus ab illo,  
" Vel iuramentis, que certius addere possum,  
" Legatis faciam venientibus omnia vestris.  
" Vos modo detis opem Balee vestre regioni,  
65" Ut qui cogit eam citius salvetur ab hoste ".  
Cognita sunt postquam que narrat epistola regis,  
Legatos regi Moroch misisse Diana  
Fertur. Et hec Balee direxit scripta Buthalis.  
" Rectori Balee populisque tuentibus ipsam  
70" Sub duce tuta suo generosa Diana salutem.  
" Quod Latii vestras invaserunt regiones  
" Nos gravat, et certe communia dampna putamus  
" Si Baleare bonum nostro tollatur honori.  
" Quod vos forte volunt dimittere iura paterna,  
75" Invitis vobis, nunquam scimus faciendum.  
" Christicole semper sunt contra dogmata nostra.  
" Nos proprie legi, si possent, subdere vellent,  
" Et servire suis obtarent cuncta tributis.  
" Gentiles populos sibi subdere quippe laborant.  
80" Nos et vosque simul parili discrimine servos  
" Quorum quis dubitet si vos violentia vincat?

[p. 98]

" Nos habeamus opes, nos defendamus honores  
" Et regimen Balee qui missimus omnia Moroch  
" Scripta ferenda probo domino nostro Mohabite  
85" Que transmisistis. Qui motus quippe suorum  
" Dilectis precibus comitatum mittet equestrem  
" Quam citius nobis. Classemque virosque paramus,  
" Ut sistamus eos tutos in litore vestro.  
" Signaque cum venient factos spectabitis ignes  
90" Montibus in vestris. Vestros attendite montes ".  
Cimba redit Baleam, verum putat esse tyrannus  
Quicquid carta refert et multum sperat in illis

Promissis hominum que mortua tergora narrant.  
Cimbala pulsantur et timpana queque per urbem,  
95Nec tuba nec lituus devotis cessat ab istis  
Leticiiis, etenim Balee sunt talia ludus.  
Comperit interea cur gaudia duceret ista  
**Barbaricus populus magnus Catalanicus heros.**  
Et vocat in cetum proceres cunctasque cohortes.  
100Ac verbis terret, si terreri potuissent,  
Quando Moabitas ex summo robore dicit,  
In patuloque docet fugientes ducere bellum,  
Nec fore poscendos nisi conducantur in artum,  
Moreque Parthorum fugiendo ferire sequentem.  
105Cum solo solum gladio contendere dixit,  
Atque graves faciunt ictus si suppetit ensis.  
" Qui non novit eos poterit satis ergo timere,  
" At nos, qui variis bellis cognovimus illos,  
" Si venient, auctore Deo, tute repetemus ".  
110Sic comes. Ast Ebusum currentes mittere naves

[p. 99]

Viginti patres communiter accelerabant.  
At sex ex illis, que precessere, per altum  
Transivere fretum, cursu propero venientes  
Quo superest pelago de duris insula saxis.  
115Prebuerat portus urbs desolata Buthali,  
Qui timet audito Latias venisse carinas,  
Et cepisse duas ratium quas duxerat ipse.  
Pectore sed dubio tandem meliora revolvens  
Cogitat Alpheos quam tutos ire, nec umquam  
120Adventum sentire suum, sparsosque per arvom  
Tendere pro preda, tutave manere quiete.  
Vera revolventem nec inanis opinio fallit.  
Ergo decem ratibus, reliquis consistere iussis  
Hic ubi portus erat tutus vicinior urbi,  
125Remige quam celeri salsos invadere fluctus  
Precipit, ac portus aditusque requirit et ambit,  
Anticipatque sinus Latios ubi noverat esse.  
A somno surgunt isti pugnare parantes.  
Marinianus habens triginta scilicet ex his  
130Quos secum duxit, festinius ire parabat  
Et pugnaturum fugiturum seque putabat,  
Cumque decem ratibus robur iuvenile per undas  
Pugnam committit. Sed vulnere Marinianus  
Afficitur, dare vela parans. Fugisse valeret;  
135Impedit hunc velum quod tunc abeundo tetendit.  
At Mauri super hunc properos fecere tumultus,  
Et cepere virum pariter sociosque ratemque,  
Debilitando prius variis vulneribus omnes.  
Tresque rates alias paucorum nomine tutas,  
140Devictas tandem secum duxere per undas.  
Plures qui fuerant loca per longinqua remoti  
Ad castrum veniunt, quod rex Norgvegus olim

[p. 100]

Destruxisse datur, predam de rure trahentes,  
Carneque viventes, siliquis et agrestibus erbis,  
145Radicibus plures etiam, modicisque steterunt  
Impensis in eo discrimina plura ferentes,  
Sepeque perpingues his esca fuistis, aselli.  
Hosque Saraceni pugnantes crebro petebant.  
Castrum tutamen Latiis crat hospiciumque.  
150Interea gemine de sex rediere carinis,  
Amissis reliquis, predamque ratemque reducunt  
Quam Balee rector fertur misisse Dianam.  
Sarcina cartarum, quam vir tellure levare  
Vix posset, patribus data, legati que fuerunt,  
155Inter quas pariles scripture comperiuntur.  
" Nazaredeolus, retinens sua regna sinisteris  
" Auspiciis, caro per cuncta valere Buthali.  
" Scripta tibi populoque tuo transmissa recepta  
" Non dubito. Legique tuas cupiendo figuras,  
160" Quando rates poterant fluctus sulcare secundos  
" Te mea prompta fides credebat fluctibus uti.  
" Nec de te mea spes mentem bene nota fefellit.

[p. 101]

" Ceptum stabat iter. Vobis dabat insula portus,  
" Que prior est per me subite subiecta ruine.  
165" Gratulor audito vestro super hoste triumpho,  
" Acta foret tanquam propria victoria dextra.  
" Non tamen inde mee plenissima gaudia menti  
" Sunt. Etenim vestros narrat michi fama recessus,  
" Sepeque sublimi de turri cernere flammam  
170" Promissas cupio. Sed eas spectare volenti  
" Si fierent, prohibent michi cum caligine nubes.  
" Illis iratus: Citius discedite, dico,  
" Non valeo per vos mea grandia vota videre.  
" Discedunt, totoque patet cum monte cacumen.  
175" Prospitio. Nusquamque tuus viget ignis in illo.  
" Ignis at ille meus, qui totis noctibus ardet,  
" In sublime sua dat grandia lumina flammam.  
" Credere non possum vestras remanere carinas  
" Quin veniant. Dabit hora locum, quo nempe venire  
180" Intrepidus poteris, Balee solatia prestans.  
" Si qua mei tibi cura subit, dilecte fidelis,  
" Non regimen portusque meos nec munera sperne.  
" Subsideris ob hoc michi, quatenus, hoste fugato  
" Et victo, pariter mecum communia regna  
185" Et commune bonum possis constanter habere ".  
His lectis, etiam quam plurima scripta leguntur,  
Queque neci deditos et eorum nominaarrant.  
Designant etiam quibus ictibus occubuerunt  
Et languore fame gentem gladioque coactam,  
190Velocis citius passuram dampna ruine.  
Interea relique servantes equora naves,  
Contempto patrum iussu predamque sequute,



Vicinas ponto villas et castra pererrant.

[p. 102]

Ast hos Maurorum sparsos per rura sequentes  
195 Gaudebant cunei propero cohibere tumultu,  
Et victos pariter prestante vigore necare.  
His inerat Salomon Flava de gente creatus,  
Cum ratibus geminis Pisanis associatus,  
Viribus et menbris ingens specieque decorus.  
200 Hic intra quedam validi campestria castris  
Collectis spoliis navem properando petebat.  
Multus eques multusque pedes contendit in ipsum,  
Inque resistentem collatis viribus ivit.  
Hunc Paganorum straverunt agmina postquam  
205 A sociis homini capud abscidere relicto,  
Vexillumque sibi vitam pariterque tulerunt.  
Hec nova facta volant, dum multos omina terrent.  
Apropiantque dies adventus omnipotentis  
Invictique Dei, de virgine quando parente  
210 Christus, nostra salus, carnem nascendo recepit.  
Languor in urbe gravis Baleari, cura famesque  
Barbaricum populum non leniter attenuarant.  
Hinc, preter carnes, hyemanti cara fuerunt  
Omnia militie. Nec vino carius ullum.  
215 Insula vastatur Balee. Rex federa poscit.  
Fama refert comites regi de pace locutos,  
Venales factos, privataque dona rogare,  
Et propter reditum Balee naves habituros,  
Cum quibus ad patrios portus remeare valerent,  
220 Si modo Pisani iungi sibi federe nollent.  
Alpheis igitur ducibus quasi religionis  
Sermones faciunt, fraternas affore curas  
Pectoribus referunt. Captivos esse petendos  
Obsidibus sumptis, citiusque rogant redeundum.

225

[p. 103]

Et cunctis coram sunt talia verba loquuti:  
" Quod petimus rex omne facit, vos laudis honorem  
" Queritis, et bellum tantum pro laude movetis  
" Seu pro divitiis; vos et Maiorica vestros  
" Sat parvipendit tantos illesa labores.  
230 " Creditis et cleris, qui vos pugnare iubentes  
" Agmina conspiciunt toto fluitantia campo,  
" Bella videre volunt, gaudent de sanguine nostro  
" Quorum doctrinam monitus et iussa refutent,  
" Hi qui victores cupiunt ex Marte reverti.  
235 " Nos igitur nullus iubeat pugnare sacerdos.  
" Quam cedat mucro nescit, quam lancea pungat.  
" Incipiat, faciat, qui diligit ista iubere,  
" Dicta quod a factis multum distare videntur.  
" Nos qui sentimus crebrosque rependimus ictus  
240 " Arbitrio pugnare decet, non iussibus horum.  
" Contra iustitiam pugnam committere iuste  
" Nemo potest. Iusti iustam cognoscite causam.  
" Sunt pro captivis qui se venisse fatentur,

" Sed pro mundano nimis altercantur honore.  
245" Captivis habitis aliud linquatur, et ultra  
" Nec laus orbis, honor, nec inanis pompa petantur,  
" Sed vexilla super pateant communia turre.  
" His habitis maiora quidem quicumque requirit  
" Aspicit haud recto Balearica menia visu.  
250" Adde Moabitibus, quos expectare feruntur,  
" Qui quantum gladiis et quantum cuspide possunt,  
" Quippe viri Martis, docuit nos bellicus usus.  
" Si venient ergo predam de rure feretis?  
" Felices sane nimium si castra tenere  
255" Vos quoque tutari promte valeatis ab ipsis.  
" Spes prede nec erit: gens hec qua lege valebit

[p. 104]

" Vivere, vitalis quando sibi decidet usus?  
" Indubitanter equis nobisque cibaria desunt,  
" Nec tam prolixa magis est ambage morandum.  
260" Dicite: quapropter, si regia federa vultis  
" Et facitis, patrias una tendamus ad edes.  
" Sive refutatis, nos incunctanter abimus ".  
His respondentes aiunt Henricus et Atho:  
" Quisquis ad has partes aliud fortasse requirat,  
265" Nos pro captivis ad eas venisse fatemur.  
" Non ob eos tantum quos detinet insula captos,  
" Ast ob eos etiam quos detentura fuisset.  
" Extirpare malum Domino faciente putamus,  
" Nec volumus post nos tantum remanere baratrum.  
270" Non quia Pisani plures teneantur ab eius  
" Pestiferis vinclis, plures de nomine vestro  
" Perpetuis penis hostilis turba trucidat,  
" Nobis vestra fides, socialia federa spondens,  
" Sub iuramento sese coniunxit. Et ultra  
275" Quam iuravistis vos obsecrare nequimus.  
" Non tenor hoc faciet iusiurandum revocare,  
" Velleque pro nostro nos non revocabimus unquam.  
" Facta semel iuste stat turpe revolvere sepe.  
" Paremus cleris, quia venit ab ordine sacro  
280" Iussio pugnandi. Nam iussit prelia papa  
" Sedis apostolice, cuius precepta sequuti  
" Tantum propositum nusquam mutare valemus.  
" Cur discedatis non fecimus, haud faciemus.  
" Hic neque discessus vobis videatur honestus.  
285" Si desunt vestes desuntque cibaria vobis,  
" Vobis et vestris quod convenit omne paramus ".  
Auditis comites his verbis conticuerunt,  
A patribus sumptus qui largos sepe petentes

[p. 105]

In proprios usus communia queque trahebant.  
290Gothorum procerum postquam siluere farores,  
A pelago redeunt custodia publica prore  
Allatis scriptis, Baleam que cimba ferebat,  
Inter que fuerat memorati carta Buthalis.

Inpensas multas ab amico nomine factas  
295 Commemorando refert; curet persolvere quicquid  
Pro se largiri rex obsecrarat amicum.  
Subsidium reliquum si quod iubet ille parari,  
Inmensos sumptus festinus mittere curet.  
Venturum sese mature premonet ante  
300 Quam geminare queat binaria cornua luna.  
At Pisana manus solitas non deserit artes  
Que sibi proficiant, festinans edificare.  
Patrum preceptis intrat quoque Carolus urbem,  
Iam dicto regi simili sermone loquutus:  
305 " Iussio Pisarum, rex, nullis territa factis,  
" Ad te me iussit concordi voce venire.  
" Huc missus patribus sociisque faventibus adsum,  
" Inque meo sensu posuerunt publica facta.  
" Prospice quod docti debent ad cuncta videre,  
310 " Et regimen retinere tuum cum pace labora,  
" Non quia Pisani multum tua federa curent,  
" Aut sine perfectis Balee remeare triumphis  
" Optent. Ista tue sint constantissima menti  
" Verba. Nec inertis memorabis singula sensu  
315 " Quicquid dico notans. Tibi iam perpende quid instet.  
" Es sapiens habitus, proprio sic consule regno,  
" Ut valeas salvus tibi conservare fideles ".  
Dixerat, et regis recipit mitissima verba.

[p. 106]

Thesaurus cunctos, spoliis promittit et urbis,  
320 Velleque pro sancto Petro se regna tenere  
Et pro Pisanis patulo sermone fatetur.  
Hincque cito sese spondet responsa daturum.  
Karolus inde redit; Pisane verba cohortes  
Accipiunt, et amant pacem laudantque voluntque.  
325 Obsidibus post hec quesitis, pacta secundum,  
Nobilium natis, mutavit verba tirampnus.  
Nam legis non esse sue prebere tributa  
Christicolis dixit, vel ab his regimen retinere.  
Firamt et hec veterum consulta fuisse suorum.  
330 Albicione sati veterem miratus amorem,  
Absque sui culpa vicioque fuisse remotum  
A se scire virum, cupideque videre precatur.  
Hic regem quesitus adit, secumque nepotem  
Ducit, et alterno regi coniunctus amore  
335 Ammonet ut populi Pisani compleat omnem  
Ipse voluntatem. Spondet rex, nec sine fraude.  
Interea Pisana super pia lumina flectens  
Astripotens rector respexit ab ethere castra,  
Et que languerant mox convaluere cohortes.  
340 Sed requies est nulla viris. In luce labores,  
Nocte repentino ferventia castra tumultu  
Crebro sollicitant stridentes Hismaelite.  
Cumque die quadam none succederet hore  
Oceanique maris peteret confinia Tytan,  
345 Stat vice qui comitum campum petit inclitus Ugo,

[p. 107]

Cui Tepertiades comites sunt atque Recuccus.  
Inter condensos cuneos memorabilis heros  
Signiferum petiit, iaculi penetrabile ferrum  
Pectore submissum fixit tellure ruentem.  
350Hinc Libicus quidam ruit ictu stratus ab eius,  
Ferrum gleba tenet, pretentaque frangitur asta.  
At pedes heroem Maurus iaculando requirit,  
Atque frementis equi transfigit viscera ferro.  
Iratus iugulare parat mavortius Ugo  
355Barbaricum iuvenem. Medios quoque currit in hostes  
Debilitatus equus tenera cum concidit erba.  
Infremit, et Mauros ardenti lumine spectans  
Pugnat, et ense ferit se circumquaque petentes,  
Multorumque simul conflictus excipit unus.  
360Cui dum subveniunt Parlasius Ugo Dodoque,  
Dat properanter equum bene promptus ob arma Recuccus.  
Iussa patres renovant. Hoc nam predantibus addunt  
Ut non desistant regionis tecta cremare,  
Et iugulare viros si quos reperire valerent.  
365Ac solidos spondent equitis de vertice quinque,  
Pro iugulo peditis binos dare constituentes.  
Sic, Balee regnum gladius populatur et ignis.  
Inde viris nummi veniunt Baleeque ruina.  
Pisanos equites cunctos vigilare simulque  
370Constitit in totis circumdare noctibus agmen.  
Tresque vices noctis, quibus alternare labores  
Continuos possent et se recreare quiete,  
Sub tribus egregie generosis distribuerunt.  
Ergo vicis prime curam Valandus habebat,  
375Valando genitus: fuit, Ildibrande, secunde  
Tradita cura tibi, Matti pulcherrima proles:  
Presidet extreme Leo, clara propago Leonis.

[p. 108]

Hi loricati sociis comitantibus ibant  
Murales aditus crebro terrore petentes.  
380Inque die castella super facienda morati,  
Ligna trahi, crates fieri properando iuebant.  
**Dux Catalanensis, cui plurimus affuit astus,**  
Ad loca sive vias per quas iter esset ad urbem,  
Intentus spoliis, multo cum milite stabat,  
385Inque Saracenos, preda iugulisque potitus,  
Letales studuit crebro conferre ruinas.  
Hoc et idem studium pre cunctis Balcius heros  
Militie ducibus clarus bellator agebat.  
Qui si quem prompto poterat superare vigore,  
390Decapitabat eum, nec ei parcebat ob aurum.  
Per solitos mores, gelido mediante decembri,  
Frigora multa dabant venti canequae pruine.  
Albebant Balee nivibus et grandine montes,  
Artabant Mauros aure de frigore nate.  
395Nempe notabantur cum cantibus edere fletus,

Quos proferre solent vigiles super ardua cure  
Menia. Pisani frigus gelidasque pruinas  
Et gentes alie letanti corde ferebant.  
Pluribus at vicibus memorantes singula patres  
400Colloquiis crebris bellum properare iuebant  
Armatasque rates Ebusi misere relictis.  
Ceperuntque leves pelagus sulcare carine.  
Sed prius a Balea puppis non magna recessit,  
Que, veniens Ebusum, fines poscebat Hyberos.  
405In rate iam dicta fuerat clarissima quedam  
In patriam rediens cum parvo femina nato.  
Sulcantem pelagus castro videre morati,

[p. 109]

Et latuere prius ne conspicerentur ab ullo.  
Moxque sinus adiit castello prora propinquos,  
410Ac prodire viri festinavere carina.  
Dum loca scrutantes equatis gressibus irent,  
Exiliens Pisana phalanx promptissima Mauros  
Primitus obstantes iaculis gladiisque necavit.  
Sed servatur ab his cum nato femina parvo.  
415Intrantes igitur navem sulcare parabant  
Pontum, cum totis aptabant carbasa remis,  
Cum subito videre duas freta scindere puppes,  
Heque cito cursu remis et fluctibus use  
Litora contigerant vicino proxima castro.  
420Pisani postquam sese novere vicissim,  
Gaudia deposito duxerunt tanta timore,  
Quanta forent dulci pro nato gaudia matri,  
Si captus dudum nunc esset ab hoste reversus,  
Redderet aut functum divina potentia vite.  
425Inde catervatim villam montesque petentes,  
Innumeris Mauris gladio stridente necatis,  
Ad magnam Baleam celeres fecere recursus.  
Letati patres omnes populusque ducesque  
Sumptus ac vestes sociis tribuere receptis.  
430Interea Petrum rex advocat, ille vocatus  
Festinanter adit regem, placideque salutat,  
Astutoque viro cautis sermonibus inquit:  
" Ut bene cognovi, rector carissime, verum  
" Sub primis verbis coniungent federa tecum  
435" Pise. Te memorem verborum credo priorum,  
" Cum quibus acceleres firmam coniungere pacem  
" Dum potes, et citius facias quodcumque requirant.  
" Sum quia Pisanus, nec ob hoc michi credere sperne.

[p. 110]

" Consiliisque meis si tu modo credere vitas,  
440" Adveniet tempus quo, rex, michi credere velles,  
" Et dictis parere meis, si posse daretur ".  
At Petro Balee respondit talia rector:  
" Petre, volunt omnes thesauros tollere nobis,  
" Nec quicquam penitus vestri dimittere cives.  
445" Divitiis pauci nostra ditantur in urbe,

" Es tam grande dari non est etiam leve paucis,  
" Ultra posse meum dare me sibi vestra requirunt  
" Agmina. Quod possum largiri querere curent,  
" Captivatorum si reddo sufficit agmen,  
450" Et cum perpetuo linquant mea federe regna.  
" Unde viri vestri si non flectuntur ad ista,  
" Inter nos et eos fiet pro velle Tonantis ".  
Sic ait. Auditis istis discessit uterque,  
Retulit ad socios colludia regia Petrus.  
455Dumque dies fluerent, festinavere paratus  
Heroes Latii cogendo viriliter hostem.  
Hi villas et rura petunt, pars obsidet urbem,  
Cedibus et flammis regnum vastatur ubique.  
Tunc Arelatensis lustrans loca singula rector  
460Castra refutabat facta sine strage videre.  
Nempe Saracenos truncos sine vertice plures  
Assiduus fecit, cuius sine sanguine fuso  
Non rediit mucro, nec acute cuspidis asta.  
Et sic Tartarea regni per inania nigri  
465Compulit ire via plures inferna petentes.  
Cerberus obstupuit tenebrose portitor aule,  
Latratusque dedit, simul atraque regna tenentem  
Reddidit umbrarum pavidum vox garula regem.  
Ille suo famulo: " Cur clamas, Cerbere? " dixit.  
470" Iam iam pande quid est cur sic mea iura resolvis

[p. 111]

" Pestifero clamore tuo torvoque latratu.  
" Infelix custos vocem sonitunique repone,  
" Vel dicas citius que gens mea regna subintrat,  
" Quis populos tantos tenebras sine luce petentes  
475" Sic properare facit: pandas quoque, Cerbere, causam ".  
Ille suo regi triplici sic ore locutus:  
" O tenebrose pater, Pisane robora gentis  
" Bella tue Balee fecisse feruntur in hora,  
" Si pars existit regni Maiorica nostri.  
480" Roma quidem monuit: dimisit papa reatus  
" Pro captivatis populo certare volenti.  
" Plurima dampna facit nos hec tollerare potestas.  
" Tartara nulla timent monitis eius morientes.  
" At nostros Pisana cohors et Balcius heros  
485" Tartareis regnis et opus transmittit eorum.  
" Nunc veniunt multi, plures michi crede futuros  
" Cum Latie turme gladiis populantibus urbem  
" Intrabunt nostram: tu mox fabricare cathenas  
" Me suadente iube. Meruit tua turba ligari,  
490" Ne fugiat penas, quas iam meruisse putatur,  
" Que Balee regem late veniendo sequetur:  
" Secum quippe tuis feret agmina plurima regnis ".  
Dixit, et infremuit furiosus rector Averni,  
Terruit et manes querulo clamore tyrampnus.  
495Exululant anime misera de carne solute  
Voce fremente ducis. Vox vallis ad ima recurrit.  
Occupat hinc langor regem faciente timore.

Ille dolore caput queritur pectusque teneri.  
Hinc thalamos intrare parans minuisse cruorem  
500Dicitur, et post hec paucis vixisse diebus.  
Ante tamen Burabe regimen cessisse putatur.

[p. 112]

Ille quasi patris perfundens balsama corpus  
Condedit, et flevit multum posuitque sepulchro.  
Cerberus hunc postquam digessit ad antra geenne,  
505Perque tenebrosam duxit Machamatus urbem,  
Stipitibus petitur, concurrunt undique manes.  
" Ad me ferte meum ", conclamat sessor Averni.  
Eachus adstiterat dextra, leva Rodomantus,  
Et medias inter dixerunt talia flammas:  
510" In tetro genitor cui non est agmine compar,  
" Ante tuos Balee rex est aterrime vultus,  
" Qui fecit plures homines occumbere ferro,  
" Compulit et multos Christi dimittere legem.  
" Et quoniam nobis socios portavit amores,  
515" Da sibi flammifera consistere semper in aula,  
" Condignasque suis meritis mox exhibe penas.  
" Huius et eternis da flammis affore gentem,  
" Perpetuasque iube socios portare catenas ".  
Turba ferum Balee regem comitata querelas  
520Prebuit ad varios subito distracta dolores.  
Ille tridente suo ferventes concitat ignes,  
Exustumque flicit tectum penetrare favillas,  
Eque venenata faciens convivium carne.  
" Vos fidusque meus mecum discumbite ", dixit.  
525Paruerant iussis, veniunt ad prandia manes.  
Ipsorum sedes lapides perhibentur adusti,  
Exurens penitus consumit flamma sedentes.  
Primi ferventes gustus venere colubri,  
Ignea qui vivi gustantum viscera torquent  
530Arida convivis sitis est, sanguisque draconum  
Felle niger multo tribuit potantibus austum.

[p. 113]

Has epulas buffo prunis sectatur adustus,  
Innumerusque fuit. Lernea venena simulque  
Perfusum supra fortem tribuere liquorem.  
535Poccula succedunt nesseis mixta venenis.  
Gustantum postquam ferventia viscera torquent,  
Spirituum rector nigrorum taliter inquit:  
" O mea turba, meis Balearem discite regem  
" Sedibus; et, quoniam cunctorum viscera fervent,  
540" Una Tantaleas vobiscum tendat ad undas.  
" Sed vestrum super hoc prius exigo cemere ludum ".  
Ut lapidem Balee mutum consistere regem  
Conspiceres; tuleratque suos oblivio sensus;  
Obstupuit quoniam rapuit terror sibi mentem.  
545Convive tandem post talia iussi tirampni  
Exiliunt, raptumque trahunt per inania regem  
Tartara, dilaniant, undis glacialibus addunt

Exustum torrem: sitis est algore soluta;  
Mittitur in flammis; dolor est algorque calorque  
550 Ignibus amoto; senserunt viscera postquam  
Pestiferam siccata sitim, properavit ad amnem;  
Sed nequid accensos ob aquam remove calores.  
Nam latices, postquam voluit contingere labris,  
Astantem fugiunt umbram. Tunc margine ripe  
555 Ut lapis immotus prorsus stupefactus adheret.  
Deglutit miserum variarum forma ferarum,  
Sicque ferum regem tenebrosus discipat Orcus.

## 8. Libro VIII

In solio regni Burabé post ista levatus  
Non permansuros citius conscendit honores,  
Usus enim regni fuit haud sibi tempore longo.

[p. 114]

Cui Pisanorum captivos turba requirens  
5 A duce crudeli non congrua verba recepit.  
Iam Natalis erat, quo Christus Virgine natus  
Obscurum mundum divina luce replevit.  
Dumque pii festi summi celebrantur honores,  
Luxque pio populo postquam bis quarta refulsit,  
10 Maimonem sociosque datos novus ire Dianam  
Rex iussit. Fluctus intravit prora marinos.  
Pisani videre ratem citius properantem.  
Tunc festinanter puppes intrare parantes  
Sumptibus auxerunt prebentes singula patres.  
15 Et dum forte viris alimenta darentur et arma,  
Maimo peregit iter. Sed qua trahit impetus illum  
Non servando vias illuc sua vela relaxat.  
Spes erat hunc cito posse capi, si signa viderent  
Qualiacumque ratis; sed ventus carbasa perflans  
20 Luminibus puppem citius subtraxit eorum.  
Maimo viam, facit Latii rediere, volentes  
In Balee regnum studiosas ponere curas.  
Et dum nituntur ceptos superare labores,  
Alterutro referunt multi si viribus aut si  
25 Ingeniis nequeant ex hoste tenere triumphum.  
Ad proprias remeare domos ultraque morari  
Sese posse negant, pro morbo sive calore  
Extinctos memorant ex egretudine plures  
Seu gladio socios, paucos quoque vivere dicunt:  
30 Pro Balee pariter destructas affore Pisas  
Urbe satis stultum, sine re, sine mente videri.

[p. 115]

Ergo rates omnes celeri reparare laborant  
Auxilio, ceptos nec deseruere paratus.  
**Interea belli Catalanicus estuat heros**  
35 Pro studio, magnaue ducem comitante caterva,  
Qua locus insidiis est, valle reponitur una.



Sol fuerat. Prima radiarant omnia luce  
Secula, porta patet, de menibus egredientes  
Per loca tuta meant solito gestamine Mauri.  
40At comes in sevos audacter prosilit hostes,  
Urbanam iuxta committens prelia portam,  
Que portum spectat qui Pineus est vocitatus.  
Utque Mohabitam viridi prostravit in erba,  
Asta viri dextrum de muris acta lacertum  
45Transiit. Exultant Mauri letale putantes  
Hoc comiti vulnus. Post hec properando per urbem  
Nomina filsa ferunt comitis de funere ficta.  
Hinc relique gaudent servantes menia turme,  
Extinctumque canunt comitem, iugulare minantur  
50Alpheos, seu perpetuis macerare catenis  
Ac penis variis alto clamore fatentur.  
Haud secus Alpheos factos sine principe clamant,  
Suadentes etiam ipsis, si vivere curent,  
Ut properent ad eos sub deditione venire.  
55Pisani contra: " Convicia vestra mineque  
" Nos sub Rege poli non cogunt ulla timere.  
" Venimus a patria summo sub principe Christo,  
" Cuius ob auxilium Balee superabimus urbem,  
" Qui servos Sathane gravibus vincire catenis  
60" Et gladiis nostris penitus dabit esse necandos.  
" Illesumque, canes, comitem scitote Pirenum,  
" Et vestre vicina satis fore tempora cladis ".

[p. 116]

Post hec contendunt ad menia ducere turres.  
Gens divisa locis, patres, divisaque bella,  
65Mox solide terre fossas velociter equant  
Ligna, lapis, vegetes, glebe proiectaque moles.  
In muris Mauri, nec progrediuntur ab urbe.  
Hinc vigor Alpheus turres ad menia ducit.  
Assistunt acies, perfringunt agmina muros.  
70Interea Pisis matrone sive puelle  
Deponunt cultus, et templis semper adherent,  
Vota vovent et thura ferunt creberrima sanctis,  
Sepeque nudatis pedibus sacra templa petentes  
Profundunt lacrimas, dure dant oscula terre,  
75Pro caris orant pium pietate Tonantem,  
Victoresque petunt sanosque videre maritos.  
Volscorum presul meriti Rogerius alti,  
Viribus insignis, factis et origine pollens,  
Laurigeras Pisas comites spoliare volentes  
80Territat, atque minans cohibet prohibetque rapinam.  
Per Latium totum ieiunia sancta precesque  
Papa iubet fieri, monet hinc et epistola Gallos.  
Annuit oranti divina potentia turbe,  
Et flentum gemitus divinas commonet aures.  
85Quadragena dies seclis celebranda quibusque  
Virginis a partu populis festiva redibat,  
Qua pia cum nato virgo sacra templa petivit,  
Infantemque pium Symeon gestavit in ulnis.

Nox fuerat celebris festive proxima luci.  
90Accendunt Latii civilia robora flammis  
Noctu, de castrisque cremant velociter unum  
Inventa nuper Danais prudentibus arte,

[p. 117]

Que miranda viros ceu nusquam visa latebat.  
Inde volant torres passim facilesque faville,  
95Acta per alterius castris scintilla subintrat  
Crates, quod flammis crescentibus ocuis ardet.  
Et candela velut siccis bene proxima lignis  
Siccam materiem tenues convertit in ignes,  
Et ceu paulatim grandis cito candet acervus,  
100Sic castrum reliquum subito candere videres,  
Virgine cum sanctis natum genitrice rogante,  
Qui propria solus replet omnia secula luce.  
Nox ea letitia repletur, luce sequuta  
Preveniunt populos non parvula gaudia sanctos.  
105Annum dum redeunt Agathes sollempnia sancte,  
De sub castello, quod porta marina peregit,  
Per triplices aditus Pisanum robur in urbem  
Pugnacis Balee robustis viribus intrat.  
At Latii cunei subierunt menia rari.  
110Subvenit auxilio trepidanti protinus ale,  
Perque satis latas agmen Latiale plateas  
Insequitur. Cecidere duo de gente Latina,  
Persistunt aditu reliqui tollerantque ruinas,  
Quas iacti lapides transmissaque tela reportant.  
115Post ubi telorum densi superant iaculatus,  
Nec locus est gladiis, fugiunt velociter extra.  
Impositum fovee succendit barbara pontem

[p. 118]

Flamma, sed Alphei pavidi successibus instant,  
Et nituntur aquis extinguere cominus ignem.  
120Ad primos aditus hi quos Provincia bello  
Misit, inire parant rigide certamina pugne,  
Contempnuntque sibi socios preferre Latinos.  
Hos brevibus tectos clipeis Balearica turba  
Aspicit, innumerisque caput seu crura sagittis  
125Figit, et e tota propellit turpiter urbe.  
Presbiter Henricus, plebanus nocte propinqua  
Somnia leticie vidit presaga future.  
Talis facta viro vox auribus: " Accipe ", dixit,  
" Astra volunt hodie Pisinis urbe repelli,  
130" Cras vespertinis horis intrabit in urbem  
" Lauriger Alpheus populus pro velle Tonantis ".  
Hoc et Toem monuit fratrem defunctus, et inquit:  
" Nec timeas, veniam socius per prelia tecum ".  
Urbem posse capi iam desperaverat agmen.  
135Per tres ergo vices committere prelia mane  
Patres atque duces communi voce iuebant.  
Nec clarum prorsus nec erat sine turbine tempus,  
Cum peditum cunei pugnam dubitanter adirent.

Moliti decies aditus intrare patentés,  
140Eiecti vicibus totidem murisque repulsi.

[p. 119]

Pretereunte die, committere prelia septem,  
Qui turrem Balee nuper captam retinebant,  
Ceperunt, aditu visam consistere primo.  
Innixus scapulas muro processerat unus,  
145Et luteum temptabat opus subvertere: Maura  
Turba virum petiit, propero quoque tela volatu  
Missa resistentis clipeum fixere tenacem  
Istius, et robur dum Maurus cemeret ingens,  
Protinus agrediens robusta cuspide fixit  
150Septemplex tegmen, sed telo protinus eius  
Durius affixus de muris concidit altis.  
Corruit eiusdem gladio percussus et alter.  
Maurorum cunei super ardua robora muri  
Plenius ascendunt, septem superare putantes,  
155Et de presenti superatos tollere vita.  
Desuper adveniens divinus Spiritus illic  
Accendit socios, quorum vox trina Tonantem  
Factorem rerum dominum confessa rogavit.  
Hi, gravibus clipeis texerunt corpora postquam,  
160Obstantes poscunt rigidis mucronibus hostes,  
Et faciunt plures collatis viribus ictus,  
Et multi plures sevo sibi dantur ab hoste.  
Tum Deus Alpheis largitus prosperitatem,  
Successus pandit letos optataque vota.  
165Barbarice gentis mutans cum casibus omen,  
Voceque terribili Mauros gladioque poposcit  
Parvula turba feros celesti tacta vigore.  
Et velut armentuni tygres seveque leene

[p. 120]

Poscunt, quando fames ipsas accerrima cogit,  
170Pestiferoque boum conscindunt viscera dente,  
Sic socii septem plures gradiuntur in hostes,  
Fundentes iaculis simul et mucronibus ipsos.  
Barbara turba fugit. Latii, clamore levato,  
Per patulos aditus socios intrare precantur.  
175Preveniunt omnes alios Sicheria proles  
Rainerius socios et Teperterius heros.  
Una Viscardus comites et Grunnius ipsis  
Extiterant propere, qui barbara terga secuti  
Cedentem turmam iaculis feriendo trucidant,  
180Introitum donec fugientibus edit alumpnis  
Robustas pandens vetus Elmodenia valvas.  
At de parte maris pugnax Eufraxius urbem  
Intrat cum nato. Stat Maura caterva platea,  
Inque viros properata ruit stridentibus armis,  
185Quos poterant terrere satis volitantia saxa.  
Intrepidus cum patre manet Bernardus, et Alcem  
Contra se positum durata cuspide sternit.  
Tunc Ildebrandus: "Ferias, precor, optime fili,

" Nec cuiquam parcas gladio si deficit asta.  
190" Pro patria pugnare docet veneranda vetustas,  
" Et nostri quondam micuere per arma parentes ".

Dixit, et Agilion iaculo prosternit; at ense  
Brusei feriens caput a cervice resolvit.  
Difugiunt statim reliqui, fugientibus instans  
195Cum genitore satus pertundit barbara terga.  
Undique currentes equites, mixti peditesque  
Audacis animi compressis gressibus intrans.  
Per solitas veluti subeunt examina sedes,  
Sic vigor Alpheus latam progressus in urbem  
200

[p. 121]

Dispensas fundit iaculis gladiisque catervas.  
Hic caput abscisus, pectus transfossus et alter,  
Visceribus fuis alius tellure iacebat,  
Humanoque nimis terram maduisse cruore  
Et fluxisse pute commotos sanguine rivos,  
205Sicut cum, proprio dimisso flumina cursu  
Expaciata satis, quando revocantur in amnem  
Efficiunt rivos plures densasque lacunas.  
At rabidos postquam gladius deleverat hostes,  
Mena cum tectis retinent urbanaque templa  
210Christicole, longus quos iam labor attenuarat,  
Et servant ipsam studiis vigilantibus urbem,  
Ac solito belli numquam removentur ab usu.  
Artibus intendunt, peragunt vincuntque labores.  
Destructis tectis via fit, castella trahuntur.  
215Namque Bebelgidith portis sunt addita bina,  
Elmodenorum totidem sunt addita muris.  
Denique turritos Latialis machina muros  
Sternit, adequantur propero conamine fosse,  
Heque cadaveribus multis lignisque replentur.  
220Barbara gens grandi nimium concussa timore  
Castra Pirenei comitis tremebunda subintrat,  
Ad quodcumque velit cupiens se iungere fedus,  
Si bellatores indempnes atque soluti  
Incolumes etiam cum libertate sinantur.  
225Talia dum referunt, cetum properanter in unum  
Accitus populus pacis de federe tractat.  
Ecclesie pastor suscepit iura cathedre.  
Clerus adest, proceresque simul, contentio crescit  
Maxima, divisas pandunt certamina mentes.  
230Pars trahit ad pactum, pars diligit altera pugnam.  
Collaudat clerus partem pugnare volentem,

[p. 122]

Sanctus et antistes (BISHOP) cum cardine prelia censet(VOTE),  
Hisque favent acies. **Contra Catalanicus heros**  
**Ampurique senex contendunt atque Videlmus.**

235Et sancti cleri fimas convertere mentes  
Muneribus largis, precibus precioque laborant.  
Hec pius, ut renuit, convicia sustinet ordo.  
Tunc cum Bernardo verbis Gratianus honestis  
Verba refert avidis Gothorum congrua dictis.

240Profundens lacrimas mestus cum cardine presul  
Sic genibus fuis numen celeste precatur:  
" Conditor omnipotens celi terreque creator,  
" Cuius perpetuo sunt condita secula iussu,  
" Et quodcumque viget, quodcumque videtur in illis,  
245" Clamantum, petimus, lugubres intende precatus,  
" Et confidentes in te, pater optime, serva,  
" Ecclesieque tue, pro te certare volenti,  
" Auxilio succurre pio: da vincere gentem  
" Sacrilegam, multa sanctorum cede madentem,  
250" Et pietate tua rogantes respice servos  
" Qui te factorem cunctorum semper adorant.  
" Et tu, sancta Dei Genitrix, regina polorum,  
" Una cum sanctis nostros suppleto rogatus ".  
Estuat interea castris Pisana iuventus.  
255Protinus incipiunt pugnam Brunocardia proles,  
Arma petunt Latii; renuit dux bella Pyrenus;  
Accedunt muris, et poscunt Hismahelitas.  
Anticipant aditus, et portis cominus instant.  
Pagane contra miscent fera bella phalanges,  
260Tutantes fractos invicto robore muros.

[p. 123]

Acrius Alpei subeunt, armisque corrusci  
Duros irrumpunt aditus virtute coacta.  
Hos lapides et tela petunt misseque sagitte  
Et quas interior iaciebat machina moles.  
265Tutantur clipeis tectos toracibus artus,  
Et iaculis missis poscunt mucronibus hostes,  
Immotique loco bellum renovantque feruntque.  
Mixta manus post hos, perpessa frequentia tela,  
Ardet in obstantem properanter currere turbam,  
270Unde graves missi veniunt in scuta molares.  
Hinc de plebe viri, conversi terga, videntur  
De fractis muris turpi cecidisse ruina.  
At qui bella queunt animi tolerare vigore  
Obstantes arcent infracto robore turmas,  
275Quamvis ter fuerant socii de marte repulsi.  
Tum vice qui comitum stat pollens viribus Ugo  
Militibus paucis intrat comitantibus urbem;  
Impetit et Mauros et cuspide turbat acuta,  
Ut celeres damas pardus per devia rura.  
280Nisibus herois cum duriter inguina fossus  
Tenderet ad manes inmanis viribus Alchas,  
Accurrunt acies relique, ferroque micanti  
Perlustrant urbem. Multum tamen ante cruoris  
Excepit tellus, quam vertere terga coacti  
285Desererent qua tunc steterant pugnando plateam.  
Vexillum peditum tunc Ansualdica proles  
Francardus gestans hostes aliunde petivit.  
Ast Ugonis eo comitantur et Uguitionis  
Artificum valide pagana per agmina vires  
290

[p. 124]

Sibillaque satus, multa comitante caterva.

Hique vigorosi certatim bella volentes  
Pugnando darsana petunt, paganaque leto  
Agmina dant. Balee poscunt velociter arcem,  
Et quacumque ruunt bellum letale videres.  
295 Interfecta iacent per cuncta cadavera templa,  
Vulnera corporibus stillant, rivique cruoris  
Undique diffusi latas tenuere plateas.  
Pars gladio percussa cadit, pars capta tenetur,  
At reliquam gentem vetus Elmodenia servat.  
300 Hinc comes accelerans alia de parte Pyrenus  
Iudeos omnes sub deditione recepat.  
Circuiens properat captam gens sancta per urbem,  
Ferre captorum dissolvens vincula fratrum,  
Cui faerant ostrum, bissus seu purpura vestes,  
305 Aurum cum gemmis, hispanaque pallia prede.  
Pars restabat adhuc, fuerat pars acta laborum.  
Vallatur populis urbs Elmodenia, cuius  
Obsidet assidue celsos gens provida muros.  
Ut castella trahant Pisani menia sternunt,  
310 Urbeque de capta planant obstantia queque.  
Qui presunt muris nutantes federa poscunt,  
Et fore non poterat variis concordia dictis.  
Angulus hanc habuit quam frangunt agmina turrim,  
Et subeunt aditus pignantum robore factos.  
315 Vi capitur turris; labor est inmensus in illa.  
Crescit, et artificum cito fit molimine maior.  
Signa superponunt, et clamant menia capta.  
Undique concurrunt, passim properatur ad arma.  
Tutantur Mauri iaculis gladiisque fenestras  
320 A Latiis factas, quorum prontissimus, acri  
Dum perstat pugna, capud emittitque fenestra,

[p. 125]

Tentus ab Alpheo perfertur crinibus extra,  
Abscisusque iacet nil proficiente Rasulla.  
Iam patet introitus; pubes Alpheia subintrat,  
325 Lesa fugit moribunda falanx, repetitque coacta  
Urbem, que regis sat parvula circuit arcem.  
Occubere tamen plures ferro, quibus extra  
Late profusus cruor extitit experimento.  
Circumstans Pisana manus muralia frangit  
330 Robora cum tectis, binasque ad menia turres  
Festinando trahit; formidine barbara turba  
Concutitur; poscunt vite tutamina pauci.  
Alpei nec concedunt, nec pacta refutant.  
Pars scalis innixa subit, pars funibus acta  
335 Excelsas scandit nec inertis robore turres.  
Barbara gens faciendo fugam conscendit in arcem.  
Arx invicta stetit bellis superanda cruentis,  
Septem protensas porrexit in aera turres  
Sat plus sublimes quam celsa theatra Quiritum.  
340 Pontica vis, late preruptis subdita saxis,  
In tuto posite latus unda proluit arcis.  
Partibus a reliquis fossa circumdatur ampla,

Lata decem fuit hec, undenis passibus alta.  
Hanc tutabantur fortes per prelia mille.

345

[p. 126]

Et darsana super positas duo robora turres  
Audaces pariter nitebantur retinere,  
Monstrabantque suos validos in bella furores.  
Dum dant assaltus crebros, dum vulnera miscent,  
Dum perimunt plures, multos fundendo cruores,  
350Turribus insistens geminis Alpheia iuventus  
Menia tutantes duros deterret Hyberos.  
Tormenti iactu muri sternuntur et hostes,  
Quos aries pulsat, quatit et densissima moles.  
Maura manus murum, per quem testudo trahenda  
355Obstantem turrem iuvenilibus acta petebat  
Viribus, in celerem mox compulit ire ruinam.  
Angulus impulsus turris ruit. Improba turba  
Protinus inde fugit. Scala Raimundus in ipsam  
Scandit, terque decem Mauros pugnando fugavit.  
360Hinc audax quemdam prosternit cuspide vasta,  
Insistens gladio multos perimit feriendo.  
His reliquos sequitur letis successibus hostes.  
Difugiunt alia dimissa barbara turri  
Agmina precipiti saltu. Sed quinque superstant.  
365Hi trabe percutiunt pugnans, fortius ille  
Perstat: tunc validi saxi confringitur ictu,  
Oraque cum mediis moles proiecta resolvit  
Faucibus, hinc lapsus de muro concidit alto,  
Belligerator obit. Celi de carne solutam  
370Accipiunt animam. Socii deflentur amores,  
Notus et ignotus lacrimas dant atque querelas,  
Et gemitus pariter mittunt communiter altos.  
Accedunt acies, turri subponitur ignis,  
Perque gradus Ugo scale Fugatia scandit.

375

[p. 127]

Quinque superstantes adversis viribus hostes  
Conantem iuvenem multo stridore coartant.  
Denique conanti poterat succurrere nemo,  
Milenos ictus clipeo galeaque ferenti.  
Longa laboris erant nimium toleranda pericla.  
380A prima solis subit hic certamina luce,  
Que nonam sane durare videntur in horam.  
Accensis animis tandem quidam sociorum  
Ingreditur turrim prudenter, summaque scandit,  
Et dum quinque petunt nudis mucronibus ipsum,  
385Ugo subit turrim, binique subinde secuntur.  
Primus et hic gladio mox privat vertice Maurum,  
Atque, rota posita, clipeum velociter huius  
Accipit, et reliquos gladio violentus eodem  
Appetit, ac binos stricto mucrone recidit.  
390Ast alios binos bini stravere sodales.  
Arx sine profuso numquam superanda cruore  
Restabat. Sedet hanc Pisana potentia circum,  
Observatque simul, venatrix utpote turba

Orrendos ursos servat, cohibetque caverna.  
395Rex novus interea factis perterritus istis,  
Postquam cuncta vidit Pisano robore vinci,  
Vivus ut evadat timidas se flectit ad artes,  
Expertosque satis promissis implet amicos.  
Et rate vectus habit, septem comitantibus illum,  
400Qui Baleare solum dudum rexere priores.  
Hunc Dodo, qui vigili servaverat equora cura,  
Sulcantem pelagus capiens ad castra reduxit.  
Christicolas nuper solitus macerare catenis

[p. 128]

Compedibus tentus rex ferrea vincla subivit.  
405Hinc Balee populus regem sibi fecit Alanta  
Hispanum, cuius nec erat durabile regnum.  
Qui, de Dalmatii leto perterritus extans  
Cui caput arripuit, nulli se credidit umquam.  
Hec timidus memorans binos sibi reperit utres,  
410Et vacuas inflans multo subflamine pelles  
Intro commissis cohibet spiramina filis.  
Sic Hispanus Alas, pro navi pellibus usus,  
Per freta longa natat, credas delphina natantem.  
Equore diffugium facit hic, sociosque relinquit.  
415Perfringunt muros urbis Pisana domosque  
Agmina, per factos aditus castella trahuntur.  
Artibus, ingeniis, augmenta per aera crescunt  
Artificum studio, civisque laborat et hospes  
Alterutri parti nimie dare dampna ruine.  
420Saxa, lapis, cespes late fundamina fosse  
Intus iacta replent; muris castella propinqua  
Consistunt; durus paries berbece foratur;  
Turres alterno conduntur in arce labore;  
Fulcra superponunt, pretiosaque pallia, telas,  
425Que sua non faceret multo mercator in auro.  
At sub castello positi de menibus ignes  
Sulphureas mittunt per aperta foramina flammam,  
Quas auste puteis poscunt et fontibus unde.  
Extinctas Latii flammam torresque putabant,  
430Clam vigiles sed erant: tunc alta palatia moles  
Et tormenta petunt; certant cum turribus unci,

[p. 129]

Funibus et tracte ducuntur ad infima turre.  
Postque dies aliquot furtive robora flammam  
Creverunt subtus, fumus quoque qualis ab Ethna  
435Progreditur, tetro quando Vulcanus in antro  
Concitat igniferas plenas caligine nubes.  
Tunc propere poscuntur aque, superadditur unda,  
Sed proiecta nequit tectas extinguere flammam.  
Castellum mox retro trahunt, dum desinat ignis.  
440A proprio postquam cessavit flamma calore,  
Ingeniosa cohors castella reducit ad arcem  
Percutiens aries impulsu perpete turrim,  
Robora celsa quatit, labuntur ad infima cautes.



Interea Sochi cum binis cessit ab arce  
445Militibus, pueris comitantibus atque puellis,  
Et dedit Alpheis precium sine nomine multum.  
At reliqui flammis sese donare minantur  
Quicquid habent precii, nisi, libertate potiti,  
Ad quecumque velint loca permittantur abire.  
450Alphei contra referunt: " Vos perdat et aurum  
" Cunctipotens vestrum, qui tam perversa putatis.  
" Carius est etenim vos tali morte resolvi  
" Nobis, quam Balee pretiosa vel optima queque ".  
Hec Gerioneus populus non percipit aure.  
455Tormentis Alpheia manus circumpetit arcem,  
Constituitque duos mirando rabore pontes.  
Menibus impositum Pisanum robur in unum  
Protinus ascendit, lente dum ponitur alter.  
Dum pugnant Mauri tantisque laboribus assunt,

460

[p. 130]

Alphei properant. Procedit Grunnius ante,  
Oppositumque sibi violentem proterit hostem,  
Iuxta quem reliqui mox progrediuntur in arcem.  
Maurorum quidam statim descendere scalas  
Incipiunt, multi sese preferre periclis  
465Mortis non dubitant, ne confodiantur inulti.  
Sed velut accipitres celeri properare rotatu  
Pennarum levitate solent, ubi plurimus anser  
Aere suspensus fluvialia deserit arva,  
Et prosecta velut promptos laniata per unguis  
470Cum plumis distracta iacent, sic cernere posses  
Pisanos properare viros, Maurosque iacere.  
Inde Pyrenee regionis rector in arcem  
Ascendens letus, superatos increpat hostes.  
Plures ense cadunt, multi cecidere fenestris.  
475Hic certat iugulare mares, trahit ille puellas,  
Et facta preda muri sternuntur et edes.  
Hinc ignis cesos et lingnea tecta perurit.  
Depopulans agros terre loca circuit hospes.  
Inde viri veniunt et cum pueris mulieres,  
480Inde boves pecudumque greges et multa supellex.

[p. 131]

Pasca celebratur. Burabe de nexibus exit,  
Cuius dat nato Pisana potentia regnum.  
Denique victores, felici classe parata,  
Ad sua quique meant. Hos et de litore spectant  
485Et miranda canunt Christi magnalia gentes.  
Pisanam tandem Burabe transductus in urbem  
Prebuit Italie sese spectabile monstrum.

[p. 132]